

論

大乘莊嚴經論

卷一
之四



大乘莊嚴經論序
 太子右庶子
 勅曰會聯如
 戲命常轉
 皇圖鞏固
 帝道遐昌

C40
4514
136

7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35





皇圖鞏固
帝衢遐昌
佛日增輝
瀆輪常轉

大乘莊嚴經論序

太子右庶子安平男臣李百藥撰

臣聞天帝受無上之法景福會昌輪王致正真之道
神祇合德是則聖人執契玄化潛通至誠所感冥功
斯應皇情西顧法海東流如開洪範之圖似得圓光
之夢持綫妙典發金口而祕綸言書葉舊章自龍宮
而升麟閣昔迦維馭世大啓法門懸明鏡於無象運
虛舟於彼岸空有兼謝生滅俱忘絕智希夷之表遺
形動寂之外然隨緣利見應跡生知震大地而萃人
天放神光而掩日月百億須彌俱霑聲教三千世界

盡入提封愍三毒之韉鎖矜五陰之纏蓋惜飛電於
浮生歎懸藤於逝水八關云關開慧識於幽塗三乘
方軌運慈心於朽宅龍興霧集神動天隨大道爲心
望法雲而遐舉聞聲悟道漸初地而依仁遷奈苑之
喬枝入祇園之奧室酌智水之餘潤承慧日之末光
旣而稅駕連河歸真雙樹聖靈逾遠像教浸微大義
或乖斯文將墜穿鑿異端分析多緒是未非古殊塗
別派天親初學之輩尙致西河之疑龍樹究竟之儔
彌深東魯之歎仰惟法寶盡諦無爲故經文云佛以
法爲師佛從法生佛依法住豈止研幾盡性妙物窮

神出入無間包含元氣而已若夫惟天爲大寒暑運
其功謂地蓋厚山澤通其氣是以姬文以大聖之姿
幽贊易道丘明懷同恥之德祖述微言諸經著論俯
同斯旨大乘莊嚴論者無著菩薩纂焉菩薩以如來
滅度之後含章秀發三十二相具體而徵八千億結
承風俱解弘通正法莊飾經王明真如功德之宗顯
大士位行之地破小乘執著成大乘綱紀其菩提一
品最爲微妙轉八識以成四智束四智以具三身詳
諸經論所未曾有可謂聞所未聞見所未見聖上受
飛行之寶命總步驟於前王屈天師之尊智周萬物

應人皇之運道照三明慈慧外宣神機內湛端扈而
役百靈垂拱而朝萬國彌綸造化之初含吐陰陽之
際功成作樂旣章韶舞治定制禮言動翠華金輪所
王封疆之固惟遠芥城雖滿龜鼎之祚無窮光闡大
猷開導羣品凡諸內典盡令翻譯摩伽陀國三藏法
師波羅頗迦羅蜜多羅唐言明友卽中天竺刹利王
之種姓也以得大唐貞觀元年十二月入京法師戒
行精勤才識明敏至德隣于初果多能亞夫將聖繼
澄什之清塵來儀上國標生遠之逸氣高步玄門帝
心簡在皇儲禮敬其博聞強記探幽洞微京城大德

莫不推許粵以貞觀四年恭承明詔又勅尚書左僕
射邗國公房玄齡散騎常侍行太子左庶子杜正倫
詮定義學法師慧乘慧朗法常智解曇藏智首道岳
惠明僧辯僧珍法琳靈佳慧贖慧淨玄謨僧伽等於
勝光寺共成勝業又勅太府卿蘭陵男蕭瑒監掌修
緝三藏法師云外國凡大小乘學悉以此論爲本若
於此不通未可弘法是以覃思專精特加研究慧淨
法師聰敏博識受旨綴文玄謨法師善達方言又兼
義解至心譯語一無紕謬以七年獻春之始撰定斯
畢勒成十有三卷二十四品勅太子右庶子安平男

李百藥序之二云爾

大乘莊嚴經論序 終

大乘莊嚴經論卷第一

無 著 苦 薩 造

唐三藏波羅頗迦羅蜜多羅譯

緣起品第一

偈曰

義智作諸義 言句皆無垢 救濟苦衆生

慈悲爲性故 巧說方便法 所謂最上乘

爲發大心者 略以五義現

釋曰莊嚴大乘經論誰能莊嚴答義智能莊嚴問義智云何莊嚴答開作諸義問以何開作答以言及句

問以何等言以何等句答以無垢言以無垢句無垢
言者謂能至涅槃城無垢句者謂字句相應若離無
垢言句則於諸義不能開曉問以何義故莊嚴答爲
救濟苦衆生故問衆生自苦何因救濟答爲菩薩者
大悲爲體生憐愍故問若救他苦莊嚴何法答莊嚴
如來巧說方便法問何等方便法答所謂最上乘問
爲誰故莊嚴答爲發大乘心者問以幾義莊嚴答略
以五義示現問何者五義偈曰

譬如金成器 譬如華正敷 譬如食美膳
譬如解文字 譬如開寶篋 是各得歡喜

五義法莊嚴 歡喜亦如是

釋曰此中五譬卽譬彼五義莊嚴如其次第能令發
大心者信向故受教故思惟故修習故證得故問其
義云何答金成譬爲令信向轉彼心故華敷譬爲令
受教開示彼故食膳譬爲令思惟得法味故解文譬
爲令修習更不思故開篋譬爲令證得真實菩提分
寶自覺證故由此五義分別大乘能令彼人得生愛
樂問若彼法自性功德具足何義更須莊嚴爲答此
問偈曰

譬如莊美質 臨鏡生勝喜 妙法莊嚴已

得喜更第一

釋曰譬如美質加莊像現於鏡則生勝喜何以故爲有悅故菩薩亦爾莊嚴妙法義入自心則生勝喜何以故爲有聞故問彼法有何功德須此莊嚴強欲令他恭敬信受耶偈曰

譬如飲藥苦 病差則爲樂 住文及解義

苦樂亦如是 譬如難事王 因事得威力

如是難解法 因解得法財 譬如見生寶

不別則不愛 如是聞妙法 不覺亦不喜

釋曰此三偈次第顯示妙法有三功德一顯斷障因

功德二顯自在因功德三顯妙喜因功德問此義云何答如飲苦藥初時則苦以難服故後時則樂以病差故此法亦爾住文時苦味難得故解義時樂障病破故如事嚴王初時則苦難得意故後時則樂與威力故此法亦爾思惟時苦深難解故思度時樂長聖財故如見生寶未別時則不愛謂無用故識別時則深重知有用故此法亦爾修行時則不喜謂空無用故修度時則深悅知有大用故緣起品究竟

成宗品第二

釋曰有人疑此大乘非佛所說云何有此功德可得

我今決彼疑網成立大乘真是佛說偈曰

不記亦同行 不行亦成就 體非體能治

文異八因成

釋曰成立大乘略有八因一者不記二者同行三者不行四者成就五者體六者非體七者能治八者文異第一不記者先法已盡後佛正出若此大乘非是正法何故世尊初不記耶譬如未來有異世尊卽記此不記故知是佛說第二同行者聲聞乘與大乘非先非後一時同行汝云何知此大乘獨非佛說第三不行者大乘深廣非忖度人之所能信況復能行外

道諸論彼種不可得是故不行由彼不行故是佛說第四成就者若汝言餘得菩提者說有大乘非是今佛說有大乘若作此執則反成我義彼得菩提亦卽是佛如是說故第五體者若汝言餘佛有大乘體此佛無大乘體若作此執亦成我義大乘無異體是一故第六非體者若汝言此佛無大乘體則聲聞乘亦無體若汝言聲聞乘是佛說故有體大乘非佛說故無體若作此執有大過失若無佛乘而有佛出說聲聞乘者理不應故第七能治者由依此法修行得無分別智由無分別智能破諸煩惱由此因故不得言

無大乘第八文異者大乘甚深非如文義不應一向隨文取義言非佛語復次若汝言初不記者由佛無功用心捨故若作此執是義不然偈曰

諸佛三因緣 現見亦護法 如來智無礙

捨者不應爾

釋曰若此大乘非佛說者是爲大障諸佛有三因緣何故不記一無功用智恒起是眼恒見二恒作正勤守護正法三如來智力無有障礙由此三因汝言捨而不記者不應道理復次若汝言有體者卽聲聞乘是大乘體何以故卽以此乘得大菩提故若作此執

是義不然偈曰

非全非不違 非行非教授 是故聲聞乘

非卽是大乘

釋曰有四因緣非卽以聲聞乘爲大乘體非全故非不違故非行故非教授故非全者聲聞乘無有利他教授但爲自厭離欲解脫而教授故非不違者若言聲聞乘以自方便而教授他卽是他利教授是義不然何以故雖以自利安他彼亦自求涅槃勤行方便不可以此得大菩提故非行者若汝言若能久行聲聞乘行則得大菩提果是義不然非方便故聲聞乘

非大菩提方便不以久行非方便能得大乘果譬如
犖角求乳不可得故非教授者如大乘教授聲聞乘
無是故聲聞乘不得卽是大乘復次今更示汝相違
義偈曰

發心與教授 方便及住持 時節下上乘
五事一切異

釋曰聲聞乘與大乘有五種相違一發心異二教授
異三方便異四住持異五時節異聲聞乘若發心若
教授若勤方便皆爲自得涅槃故住持亦少福智聚
小故時節亦少乃至三生得解脫故大乘不爾發心

教授勤方便皆爲利他故住持亦多福智聚大故時
節亦多經三大阿僧祇劫故如是一切相違是故不
應以小乘行而得大乘果復次若汝言佛語有三相
一者入修多羅二者顯示毗尼三者不違法空汝以
一切法無自性而爲教授違此三相故非佛語若作
此執是義不然偈曰

入自大乘經 現自煩惱滅 廣大甚深義
不違自法空

釋曰今此大乘亦不違三相入自大乘修多羅故現
自煩惱毗尼故由菩薩以分別爲煩惱故廣大甚深

卽是菩薩法空不違此空得大菩提故是故此乘與
三相不相違復次前說不行者我今更示此義令汝
信受偈曰

有依及不定 緣俗亦不普 退屈忖度人
寧解大乘義

釋曰由有五因彼忖度者不能得入大乘境界彼智
有依故不定故緣俗故不普故退屈故有依者智依
教生非證智故不定者有時更有異智生故緣俗者
忖度世諦不及第一義諦故不普者雖緣世諦但得
少解不解一切故退屈者諍論辯窮卽默然故大乘

者卽無所依乃至終不退屈不退屈者無量經中有
百千偈說大乘法由得此法辯才無盡是故大乘非
忖度人境問汝說聲聞乘非佛菩提方便若爾何者
是耶偈曰

廣大及甚深 成熟無分別 說此二方便
卽是無上乘

釋曰廣大者謂諸神通由極勤方便令他信解故甚
深者謂無分別智由難行故如其次第一爲成熟衆
生二爲成熟佛法卽說此二爲無上乘提方便此二
方便卽是無上乘體問若爾有人於中怖畏過失云

何偈曰

不應怖而怖 由怖被燒然 怖引非福故

長時過患起

釋曰若人非怖畏處妄生怖畏是人卽墮極熱惡道而被燒然何以故由此怖畏引大非福聚生由此罪故能令是人經無量劫受大熱惱問彼人復有何因生此怖畏偈曰

非性非法朋 少慧少因力 怖此深妙法

退失大菩提

釋曰若人生怖由四因緣一非種性離菩薩性故二

非法朋離善知識故三少慧力未解大乘法空故四少因力先世不種諸波羅蜜自性善根故由此因緣於甚深妙法橫生怖想由是想故於大菩提福智二聚應得不得是名爲退汝今應知此退過患最極深重已說怖過及怖因次說不應怖畏因偈曰

無異卽互無 有異卽險處 無譬種種說

續說多門說 非有如文義 諸佛甚深體

聰慧正觀人 應知不應怖

釋曰無異卽互無者若汝言聲聞乘卽是大乘無異大乘體若如是者卽聲聞辟支佛乘復無有體何以

故由得佛故如是一切皆是佛乘何因怖耶有異卽
險處者若汝許有異大乘體此體卽是一切智道最
爲第一險處由難度故此應仰信何因怖耶無譬者
於一時中無二大乘並出可以相比何因怖一不怖
二耶種種說者今此大乘非獨說空亦說大福智聚
應解此意何因獨怖空耶續說者一切時中決定相
續說空汝非乍聞何因怖耶多門說者彼彼經中多
門異說顯大要用破諸分別得無分別智若異此說
無大用者如來但應言空不說如法性實際等旣說
有多門何因獨怖空耶非有如文義者大乘甚深不

如文義何因隨文取義而怖空耶諸佛甚深體者佛
性甚深卒難覺識應求了別何因怖耶由如是等因
緣故聰慧正觀人於此大乘不應怖畏已說不應怖
畏因次說能行此法智偈曰

隨次聞思修 得法及得慧 此智行此法

未得勿非毀

釋曰若人最初依善知識能起正聞次於正義能起
正憶次於真實境界得生正智次從彼彼得證法果
次從彼後起解脫智是人此智隨深入遠能行此法
汝若自無此智不應決定言非佛語已說能行此法

智次遮怖畏此法句偈曰

不解解不深 深非思度解 解深得解脫

諸怖不應爾

釋曰不解者若汝言如是深法非我所解如是起怖畏者不應爾解不深者若汝言佛解亦不深如其解深何故說深如是起怖畏者不應爾深非思度解者若汝言何故此深非思量境界如是起怖畏者不應爾解深得解脫者若汝言何故獨解深義能得解脫非思量人能得解脫如是起怖畏者不應爾如是已遮怖畏此法句次以不信成立大乘偈曰

由小信界伴 不解深大法 由汝不解故

成我無上乘

釋曰由小信者狹劣信解故小界者阿黎耶識中熏習小種子故小伴者相似信界爲眷屬故此三若小則不信別有大乘由此不信則成我所立是無上法已說成立大乘次遮謗毀大乘偈曰

隨聞而得覺 未聞慎勿毀 無量餘未聞

謗者成癡業

釋曰汝隨少聞得有覺悟不應隨聞復生謗毀汝於未聞無信可爾何以故不積善故未聞者多慎勿謗

毀汝無簡別若生謗毀更增癡業壞前聞故已遮謗
毀次過邪思偈曰

如文取義時 師心退真慧 謗說及輕法
緣此大過生

釋曰師心者謂自見取非智者邊求義故退真慧者
如實真解未得退故謗說者毀善說故輕法者嫉所
聞故緣此非福次身受大苦報是名大過起已過邪
思次遮惡意偈曰

惡意目性惡 不善不應起 況移於善處
應捨大過故

釋曰惡意者是憎嫉心自性惡者此心是自性罪尚
不可於過失法中起何況於非過法中起是故急應
須捨大過患故成宗品究竟

歸依品第三

釋曰如此已成立大乘次依大乘攝勝歸依偈曰

若人歸三寶 大乘歸第一 一切遍勇猛
得果不及故

釋曰一切歸依三寶中應知大乘歸依最爲第一何
以故由四種大義自性勝故何者四義一者一切遍
義二者勇猛義三者得果義四者不及義此義後當

說由此四義多有畱難諸歸依者或能不能者爲勝已說歸依勝次勸勝歸依偈曰

難起亦難成 應須大志意 爲成自他利
當作勝歸依

釋曰難起者所謂勝願由弘誓故難成者所謂勝行由經無量劫故由如此難應須發大志意何以故爲欲成就他利與自利故他利者所謂願行由願行是名聞因故自利者所謂大義由大義是自體果故前說四義今當先說一切遍義偈曰

衆生遍乘遍 智遍寂滅遍 是名智慧者

四種一切遍

釋曰大乘歸依者有四種一切遍一者衆生一切遍欲度一切衆生故二者乘一切遍善解三乘故三者智一切遍通達二無我故四者寂滅一切遍生死涅槃體是一味過惡功德不分別故已說一切遍義次說勇猛義偈曰

希望佛菩提 不退難行行 諸佛平等覺
勇猛勝有三

釋曰大乘歸依有三種勝勇猛一願勝勇猛歸依佛時求大菩提多生歡喜知勝功德故二者行勝勇猛

起修行時不退不屈難行行故三者果勝勇猛至成佛時與一切諸佛平等覺故復次由此勇猛彼諸佛子恒得善生偈曰

發心與智度 聚滿亦大悲 種子及生母

胎臟乳母勝

釋曰菩薩善生有四義一者種子勝以菩提心爲種子故二者生母勝以般若波羅蜜爲生母故三者胎臟勝以福智二聚住持爲胎臟故四者乳母勝以大悲長養爲乳母故復次善生者由勇猛故恒得勝身偈曰

妙相成生力 大樂大方便 如此四成就
是名爲勝身

釋曰菩薩身勝有四種一者色勝得妙相嚴身勝轉輪王等相故二者力勝得成熟衆生自在力故三者樂勝得寂滅上品佛地無邊樂故四者智勝得拔救一切衆生大巧方便故此四成就是名佛子善生所謂色成就力成就樂成就智成就復次由此勇猛得與王子相似偈曰

先授法自在 巧說善治攝 由此四因故
佛種則不斷

釋曰由四因緣王種不斷一者入位受職二者增上無違三者善能決判四者分明賞罰善生佛子亦爾一者蒙先授謂一切諸佛與大光明令受職故二者法自在謂於一切法中智慧自在他無違故三者能巧說謂對佛衆生善說法故四者善治罰謂於學戒者過惡能治功德能攝故復次由此勇猛得與大臣相似偈曰

入度見覺分 持密利衆生 由此四因故
得似於大臣

釋曰有四種因是大臣功德一者入王禁宮二者見王妙寶三者祕王密語四者自在賞賜勇猛菩薩亦爾一者常得善入諸波羅蜜二者常見處處經中大菩提分寶由不忘法故三者常持如來身口意密四者常能利益無邊衆生已說勇猛義次說得果義偈曰

福德及尊重 有樂亦苦滅 證樂證法陰
習盡有滅捨

釋曰大乘歸依者得此八果一者信解時得大福德聚二者發心時得三有尊重三者故意受生時得三有中樂四者解自他平等時得大苦聚滅亦得滅一

切衆生苦力五者入無生忍時覺證最上樂六者得菩提時證大法陰法陰者所謂法身如此法身名爲大名爲勝名爲常名爲善聚是無邊修多羅等法藏故名大一切法中最上故名勝永無有盡故名常爲力無畏等善法積聚故名善聚七者得熏習聚盡永滅無餘八者得有滅捨有捨者不住生死滅捨者不住涅槃已說得果義次說不及義偈曰

大體及大義 無邊及無盡 由善世出世
成熟神通故

釋曰大乘歸依者所有善根由四因故一切聲聞辟

支佛所不能及一者大體二者大義三者無邊四者無盡問此云何答大體者謂世間善根已得超過二乘故大義者謂出世善根二乘出世但自利故無邊者謂成熟善根能成熟無邊衆生故無盡者謂神通善根至無餘涅槃亦無盡故已說歸依勝義次說歸依差別偈曰

希望及大悲 種智亦不退 三出及二得
差別有六種

釋曰歸依差別有六種一自性二因三果四業五相應六品類希望爲自性至心求佛體故大悲爲因爲

一切衆生故種智爲果得無上菩提故不退爲業行
利他難行行不退不屈故三出爲相應具足三乘出
離行故二得爲品類世俗得法性得麤細差別故已
說功德差別次說行差別偈曰

歸依有大義 功德聚增長 意悲遍世間
廣流大聖法

釋曰大義謂自他利行自利行者謂功德增長復有
多種若思度若數數若時節皆無有量由不可思度
故不可數知故畢竟恒行時無分齊故他利行者作
意及悲遍一切衆生故廣流大聖法故大聖

法者大乘法故歸依品究竟

種性品第四

釋曰已說歸依義次說種性差別偈曰

有勝性相類 過惡及功德 金譬與寶譬
九種各四種

釋曰種性有九種差別一有體二最勝三自性四相
貌五品類六過惡七功德八金譬九寶譬如是九義
一一各有四種差別此偈總舉餘偈別釋此中先分
別有體偈曰

由界及由信 由行及由果 由此四差別

應知有性體

釋曰種性有體由四種差別一由界差別二由信差別三由行差別四由果差別由界差別者衆生有種種界無量差別如多界修多羅說由界差別故應知三乘種性有差別由信差別者衆生有種種信可得或有因力起或有緣力起能於三乘隨信一乘非信一切若無性差別則亦無信差別由行差別者衆生行行或有能進或有不能進若無性差別則亦無行差別由果差別者衆生菩提有下中上子果相似故若無性差別則亦無果差別由此四差別是故應知

種性有體已說種性有體次說種性最勝偈曰

明淨及普攝 大義亦無盡 由善有四勝
種性得第一

釋曰菩薩種性由四種因緣得爲最勝一由善根明淨二由善根普攝三由善根大義四由善根無盡何以故非諸聲聞等善根如是明淨故非一切人善根攝力無畏等故餘人善根無他利故餘人善根涅槃時盡故菩薩善根不爾由此爲因種性最勝已說種性最勝次說種性自性偈曰

性種及習種 所依及能依 應知有非有

功德度義故

釋曰菩薩種性有四種自性一性種自性二習種自性三所依自性四能依自性彼如其次第復次彼有者因體有故非有者果體非有故問若爾云何名性答功德度義故度者出生功德義由此道理是故名性已說種性自性次說種性相貌偈曰

大悲及大信 大忍及大行 若有如此相
是名菩薩性

釋曰菩薩種性有四種相貌一大悲爲相哀愍一切苦衆生故二大信爲相愛樂一切大乘法故三大忍

爲相能耐一切難行行故四大行爲相遍行諸波羅蜜自性善根故已說種性相貌次說種性品類偈曰
決定及不定 不退或退墮 遇緣如次第

品類有四種

釋曰菩薩種性品類略說有四種一者決定二者不定三者不退四者退墮如其次第決定者遇緣不退不定者遇緣退墮已說種性品類次說種性過失偈曰

應知菩薩性 略說有四失 習惑與惡友
貧窮屬他故

釋曰菩薩種性過失略說有四種一者習惑功德不行煩惱多行故二者惡友離善知識狎弊人故三者貧窮所須眾具皆乏少故四者屬他繫屬於人不自在故已說種性過失次說種性功德偈曰

功德亦四種 雖墮於惡趣 遲入復速出 苦薄及悲深

釋曰菩薩種性雖有如前過失若墮惡道應知於中復有四種功德一者遲入不數墮故二者速出不久住故三者苦薄逼惱輕故四者悲深哀愍眾生亦成就故已說種性功德次說種性金譬偈曰

譬如勝金性 出生有四種 諸善及諸智

諸淨諸通故

釋曰勝金性者所出有四義一者極多二者光明三者無垢四者調柔菩薩種性亦爾一者為無量善根依止二者為無量智慧依止三者為一切煩惱障智障得清淨依止四者為一切神通變化依止已說種性金性譬次說種性寶性譬偈曰

譬如妙寶性 四種成就因 大果及大智

大定大義故

釋曰妙寶性者四種成就依止一者真成就依止二

者色成就依止三者形成就依止四者量成就依止
菩薩種性亦爾一者爲大菩提因二者爲大智因三
者爲大定因定者由心住故四者爲大義因成就無
邊衆生故已廣分別性位次分別無性位偈曰

一向行惡行 普斷諸白法 無有解脫分
善少亦無因

釋曰無般涅槃法者是無性位此略有二種一者時
邊般涅槃法二者畢竟無涅槃法時邊般涅槃法者
有四種人一者一向行惡行二者普斷諸善法三者
無解脫分善根四者善根不具足畢竟無涅槃法者
無因故彼無般涅槃性此謂但求生死不樂涅槃人
已說無性次說令人偈曰

廣演深大法 令信令極忍 究竟大菩提
二知二性勝

釋曰廣演深大法者爲利他故謂無智者令得大信
已大信者令成就極忍能行不退已極忍者令究竟
成就無上菩提二知者謂諸凡夫及諸聲聞若得如
是彼諸二人則知自性性德圓滿性最爲殊勝問云
何勝偈曰

增長菩提樹 生樂及滅苦 自他利爲果

此勝如吉根

釋曰如是種性能增長極廣功德大菩提樹能得大樂能滅大苦能得自他利樂以為大果是故此性最為第一譬如吉祥樹根菩薩種性亦爾種性品究竟大乘莊嚴經論卷第一終

音釋

綫私箭切 韁居良切 纂作管切 辰隱豈切 邗雲俱與線同切 璟居永切 綴抹衛切 篋詰叶切 犖居候切 也乳

大乘莊嚴經論卷第二

無 著 善 薩 造

唐三藏波羅頗迦羅蜜多羅譯

發心品第五

釋曰如是已分別菩薩種性次分別菩薩發菩提心相偈曰

勇猛及方便 利益及出離 四大三功德

二義故心起

釋曰菩薩發心有四種大一勇猛大謂弘誓精進甚深難行長時隨順故二方便大謂披弘誓甲已恒時

方便勤精進故三利益大謂一切時作自他利故四出離大謂爲求無上菩提故復次此四種大顯示三種功德第一第二大顯示作丈夫所作功德第三大顯示作大義功德第四大顯示受果功德此三功德以二義爲緣所謂無上菩提及一切衆生由此思故發菩提心已說發心相次說發心差別偈曰

信行與淨依 報得及無障 發心依諸地

差別有四種

釋曰菩薩發心依諸地有四種差別一信行發心謂信行地二淨依發心謂前七地三報得發心謂後三

地四無障發心謂如來地已說差別次當廣釋問如此發心以何爲根何所依止何所信何所緣何所乘何所住何等障難何等功德何等自性何所出離何處究竟偈曰

大悲與利物 大法將種智 勝欲亦大護

受障及增善 福智與修度 及以地地滿

初根至後竟

隨次解應知

釋曰菩薩發心以大悲爲根以利物爲依止以大乘法爲所信以種智爲所緣爲求彼故以勝欲爲所乘欲無上乘故以大護爲所住住菩薩戒故以受障爲

難起異乘心故以增善爲功德以福智爲自性以習諸度爲出離以地滿爲究竟由地地勤方便與彼彼相應故如此已廣分別次說受世俗發心偈曰

友力及因力 根力亦聞力 四力總二發

不堅及以堅

釋曰若從他說得覺而發心是名受世俗發心此發心由四力一者友力發心或得善知識隨順故二者因力發心或過去曾發心爲性故三者根力發心或過去曾行諸善根所圓滿故四者聞力發心或處處說法時無量衆生發菩提心故又習善根者或現在

如法常聞受持等故復次彼四力發心總爲二種一者不堅發謂友力發心故二者堅發謂因等三力發心故已說世俗發心次說第一義發心偈曰

親近正遍知 善集福智聚 於法無分別

最上眞智生

釋曰第一義發心顯有三種勝一教授勝親近正遍知故二隨順勝善集福智聚故三得果勝生無分別智故此發心名歡喜地由歡喜勝故問此勝以何爲因偈曰

諸法及衆生 所作及佛體 於此四平等

故得歡喜勝

釋曰四平等者一法平等由通達法無我故二衆生平等由至得自他平等故三所作平等由令他盡苦如自盡苦故四佛體平等由法界與我無別決定能通達故已說勝因次說勝差別偈曰

生位及願位 亦猛亦淨依 餘巧及餘出
六勝復如是

釋曰第一義發心復有六勝一生位勝二願位勝三勇猛勝四淨依勝五餘巧勝六餘出勝問此六云何勝偈曰

生勝由四義 願大有十種 勇猛恒不退
淨依二利生 巧便進餘地 出離善思惟

如此六道理 次第成六勝

釋曰生勝由四義者一種子勝信大乘法爲種子故二生母勝般若波羅蜜爲生母故三胎臟勝大禪定樂爲胎臟故四乳母勝大悲長養爲乳母故願大有十種者十大願如十地經說發此願勝故勇猛恒不退者能行難行永不退故淨依二利生者一知自近善提二知利他方便故巧便進餘地者得趣上地方便故出離善思惟者思惟住諸地中所建立法故問

論

大乘莊嚴經論卷第二

四

次

云何思惟答如所建立分齊分別知故以是分別亦知無分別故已說發心次說譬喻顯此發心偈曰

如地如淨金 如月如增火 如藏如寶篋

如海如金剛 如山如藥王 如友如如意

如日如美樂 如王如庫倉 如道如車乘

如泉如喜聲 如流亦如雲 發心譬如

釋曰如此發心與諸譬喻何義相似答譬如大地最初發心亦如是一切佛法能生持故譬如淨金依相應發心亦如是利益安樂不退壞故譬如新月勤相應發心亦如是一切善法漸漸增故譬如增火極依

相應發心亦如是益薪火熾積行依極故譬如大藏檀波羅蜜相應發心亦如是以財周給亦無盡故譬如寶篋尸波羅蜜相應發心亦如是功德法寶從彼生故譬如大海屢提波羅蜜相應發心亦如是諸來違逆心不動故譬如金剛毗梨耶波羅蜜相應發心亦如是勇猛堅牢不可壞故譬如山王禪波羅蜜相應發心亦如是物無能動以不亂故譬如藥王般若波羅蜜相應發心亦如是惑智二病此能破故譬如善友無量相應發心亦如是一切時中不捨衆生故譬如如意珠神通相應發心亦如是隨所欲現能成

論

大乘莊嚴經論卷第二

五

就故譬如盛日攝相應發心亦如是如日熟穀成熟
衆生故譬如美樂辯相應發心亦如是說法教化攝
衆生故譬如國王量相應發心亦如是能爲正道不
壞因故譬如倉庫聚相應發心亦如是福智法財之
所聚故譬如王路覺分相應發心亦如是大聖先行
餘隨行故譬如車乘止觀相應發心亦如是二輪具
足安樂去故譬如涌泉總持相應發心亦如是聞者
雖多法無盡故譬如喜聲法印相應發心亦如是求
解脫者所樂聞故譬如河流自性相應發心亦如是
無生忍道自然而流不作意故譬如大雲能成世界

方便相應發心亦如是示現八相成道化衆生故如
此等及三十二譬譬彼發心如聖者無盡慧經廣說
應知已說發心譬喻次說不發心過失偈曰

思利及得方 解義亦證實 如是四時樂

趣寂則便捨

釋曰菩薩有四種樂一思利樂謂思惟利益他時二
得方樂謂至得巧方便時三解義樂謂解了大乘意
時四證實樂謂證入法無我時若人棄捨衆生趣向
寂滅應知是人不得菩薩如是四樂已訶不發心發
心者應讚歎偈曰

論
最初發大心 善護無邊惡 善增悲增故

樂喜苦亦喜

釋曰若菩薩初發大菩提心爾時依無邊衆生卽得善護不作諸惡爲此故是人遠離退墮惡道畏復次由有善及增故於樂常喜由有悲及增故於苦常喜爲此故是人遠離退失善道畏已讚發心次說因此發心得不作讚偈曰

愛他過自愛 忘已利衆生 不爲自憎他

豈作不善業

釋曰若略示彼義菩薩愛他過於自愛由此故忘自

身命而利於他不爲自利而損於彼由此故能於衆生絕諸惡業已說得不作護次說得不退心偈曰

觀法如知幻 觀生如入苑 若成若不成

或苦皆無怖

釋曰菩薩觀一切諸法如似知幻若成就時於煩惱不生怖菩薩觀自生處如入園苑若不成就時於苦惱亦不生怖若如是者更有何意而退菩提心耶復次偈曰

自嚴及自食 園地與戲喜 是有四事

悲者非餘乘

釋曰菩薩以自功德而爲自嚴以利他歡喜而爲自食以作意生處而爲園地以神通變化而爲戲喜如此四事唯菩薩有於二乘無菩薩既有此四事云何當退菩提心已說不退心次遮畏苦心偈曰

極勤利衆生 大悲爲性故 無間如樂處

豈怖諸有苦

釋曰菩薩以大悲爲體是故極勤利他雖入阿鼻地獄如遊樂處菩薩如是於餘苦中豈生怖畏因此怖畏而退心耶偈曰

大悲恒在意 他苦爲自苦 自然作所作

待勸深慙羞

釋曰諸菩薩大悲闍黎常在心中若見衆生受苦卽自生苦由此道理自然作所應作若待善友勸發深生極重慙羞偈曰

荷負衆生擔 懈怠醜非勝 爲解自他縛

精進應百倍

釋曰菩薩發心荷負衆生重擔若去賒緩此是醜事非爲第一端正衆生菩薩應思若若他有種種急縛謂惑業生爲解此縛應須百倍精進過波聲聞作所應作發心品究竟

二利品第六

釋曰已說發心次說依此發心隨順修行自他利行偈曰

大依及大行 大果次第說 大取及大忍

大義三事成

釋曰大依者依止大菩提而發心故大行者為利自他而發行故大果者令得無上菩提故如其次第大取者發心時攝一切眾生故大忍者發行時忍一切大苦故大義者得果時廣利一切眾生業成就故已說次第次說自他無差別偈曰

他自心平等 愛則於彼勝 如有勝想

二利何差別

釋曰菩薩得他自心平等或由信得謂世俗發心時或由智得謂第一義發心時菩薩雖有此心然愛他身則勝自身於他既有如此勝想則不復分別何者為自利何者為利他俱無別故已說無差別次說利他勝偈曰

於世無怨業 利彼恒自苦 悲性自然起

是故利他勝

釋曰菩薩於諸世間久絕怨業是故恒為成就他利

自身受諸勤苦由大悲爲體自然起故由此道理則
利他爲勝間如是利他云何隨順偈曰

善說令歸向 令人亦令調 令成亦令住

令覺令解脫 集德及生家 得記并受職

至成如來智 以是利羣生

釋曰三種衆生謂住下中上性菩薩如其所住而攝
取之以十三種隨順利益一者善說由隨教及記心
故二者令歸向由神通力故三者令人由向已能令
信受正教故四者令調由入已斷其疑故五者令成
由成熟善根故六者令住由教授令心住故七者令
覺由得智慧故八者令解脫由得神通等諸勝功德
故九者集德由遍集福智故十者生家由生佛家故
十一者得記由八地受記故十二者受職由十地受
職故十三者得如來智由入佛地故問如此隨順云
何成立偈曰

不倒及不高 無著亦通達 能忍及調順

遠去亦無盡 應知此八義 成就彼十三

釋曰不倒者若人已住於性菩薩隨機而爲說法不
妄授故不高者彼歸向時不恃神通而自高故無著
者彼入正法時不染衆生故通達者斷彼疑網故能

忍者善成熟彼故調順者隨順教授非不調教授故
遠去者隨順生家等非不遠去令他能作故無盡者
菩薩利益衆生一切時願無盡故是名成就應知問
此隨順云何勝差別偈曰

習欲大可畏 有愛動而倒 樂滅斷煩惱

大悲求佛法

釋曰習欲者謂欲界人大可畏者身心苦多及向惡
趣故有愛者謂色無色界人動而倒者彼樂無常故
動行苦故倒樂滅者謂自利人斷煩惱者由煩惱所
持則苦不斷爲離苦故自斷煩惱而求寂滅大悲者

謂利他人求佛法者此人常求一切佛法擬利一切
衆生故偈曰

世間求自樂 不樂恒極苦 菩薩勤樂他
二利成上樂

釋曰世間愚癡常求自樂而不得樂反得極苦菩薩
不爾常勤樂他而二利成就更得第一大涅槃樂此
是菩薩勝隨順差別已說利他隨順次以此行廻向
衆生偈曰

異根於異處 異作有異行 凡是諸所作
廻以利衆生

論
釋曰菩薩迴向隨眼等諸根行種種處作種種威儀業行利益眾生凡是諸行若事相應及以相似彼皆迴向一切眾生如行清淨經中廣說已說迴向心次遮不忍心偈曰

眾生不自在 常作諸惡業 忍彼增悲故

無惱亦無違

釋曰眾生爲煩惱所惱心不自在是故作諸惡業菩薩智慧於彼常起大忍增長大悲是故於彼不起惱心亦不欲作不隨順事已遮不忍心次顯隨順大偈曰

勝出與寂靜 功德及利物 次第依四義

說大有四種

釋曰諸菩薩有四種隨順大一者勝出大於三有五趣中而勝出故如般若波羅蜜經說須菩提若色有法非無法者是摩訶衍不能勝出一切世間天人阿脩羅故二者寂靜大隨向無住處涅槃故三者功德大福智二聚增長故四者利物大常依大悲不捨眾生故二利品究竟

眞實品第七

釋曰已說隨順修行次說第一義相偈曰

非有亦非無 非如亦非異 非生亦非滅
非增亦非減 非淨非不淨 此五無二相

是名第一義 行者應當知

釋曰無二義是第一義五種示現非有者分別依他二相無故非無者眞實相有故非如者分別依他二相無一實體故非異者彼二種如無異體故非生非滅者無爲故非增非減者淨染二分起時滅時法界正如是住故非淨者自性無染不須淨故非不淨者客塵去故如是五種無二相是第一義相應知已說第一義次遮於彼起顛倒偈曰

我見非見我 無相非無緣 異二無我故

解脫唯迷盡

釋曰我見非見我者無我相故何以故由我相但是分別故非無緣者煩惱習氣所起緣五受陰故異二無我故者二謂我見及五受陰亦非異此二種而有我相如是我見但是迷謬實無我相可得故解脫唯迷盡者若緣自身起解脫亦唯迷盡無別有我名解脫者故已遮妄見次訶顛倒偈曰

云何依我見 不見苦自性 迷苦及苦者

法性與無性

論
釋曰云何依我見不見苦自性者咄哉世間云何依止我見起種種迷不能了達諸行是苦自性而常隨逐邪迷苦及苦者法性與無性者苦謂受彼苦觸苦者謂苦不斷非我與苦相應名爲苦者迷苦謂不解苦自性迷苦者謂不解無我法性者唯法由人無我故無性者非法由法無我故偈曰

云何緣起體 現見生異見 闇故不見有 亦復不有見

釋曰云何緣起體現見生異見者咄哉世間云何現見諸行各從緣起而依此體橫生異見謂眼等諸根體非緣起邪闇故不見有亦復不有見者由無明故緣起之法是有而不見有我體不有而復有見問若爾云何得涅槃偈曰

生死與涅槃 無二無少異 善住無我故 生盡得涅槃

釋曰生死涅槃無有二乃至無有少異何以故無我平等故若人善住無我而修善業則生死便盡而得涅槃如是已遮顛倒次應說彼對治偈曰

福智無邊際 生長悉圓滿 思法決定已 通達義類性

釋曰此偈顯第一集大聚位福智無邊際者由差別無數及時節無邊故生長悉圓滿者菩薩集此大聚到彼听故思法決定已者依止定心而思惟故通達義類性者解所思諸法義類悉以意言爲自性故偈曰

已知義類性 善住惟心光 現見法界故

解脫於二相

釋曰此偈顯第二通達分位由解一切諸義唯是意言爲性則了一切諸義悉是心光菩薩爾時名善住唯識從彼後現見法界了達所有二相卽解脫能執

所執偈曰

心外無有物 物無心亦無 以解二無故

善住眞法界

釋曰此偈顯第三見道位如彼現見法界故解心外無有所取物所取物無故亦無能取心由離所取能取二相故應知善住法界自性偈曰

無分別智力 恒平等遍行 爲壞過聚體

如藥能除毒

釋曰此偈顯第四修道位菩薩入第一義智轉依已以無分別智恒平等行及遍處行何以故爲壞依止

依他性熏習稠林過聚相故問此智力云何答譬如
阿伽陀大藥能除一切衆毒彼力如此偈曰

緣佛善成法 心根安法界 解念惟分別

速窮功德海

釋曰此偈顯第五究竟位緣佛善成法者諸菩薩於
佛善成立一切妙法中作總聚緣故問云何總聚緣
答心根安法界此明入第一義智故由此慧安住法
界是故此心名根問此後復云何答解念唯分別謂
此後起觀如前觀事處處念轉解知諸念唯是分別
非實有故問如此知已得進何位答速窮功德海謂

如是知已佛果功德海能速窮彼岍故真實品究竟
神通品第八

釋曰說真實義已次顯菩薩神通相偈曰

起滅及言音 心行亦先住 向彼令出離

六智自在通

釋曰起滅者謂生死智境知諸衆生生死故言音者
謂天耳智境隨彼所起言語悉聞知故心行者謂他
心智境能知他人 心行差別故先住者謂宿命智境
知彼先住善惡所集故向彼者謂如意智境隨彼處
處往教化故出離者謂漏盡智境知彼衆生出離應

不應故如此六智於諸世界六義差別遍知無礙勇
猛自在是名菩薩神通自性已說自性次說修習偈
曰

第四極淨禪 無分別智攝 如所立方便
依此淨諸通

釋曰如所依禪如所攝智如所立方便菩薩作意修
習則得最上神通已說修通次說得果偈曰

三住住無比 所往善供養 令彼得清淨
是說神通果

釋曰神通有三種果一勝住果此住有三種一聖住

二梵住三天住所得無比無上故二善供養果隨所
往處世間衆生大供養故三令他清淨果能令供養
者得清淨故問神通有六種業一自業二他業三光
業四戲業五化業六淨業此云何偈曰

世生成壞事 見彼猶如幻 種種他所欲
自在隨意成

釋曰此偈上半顯示自業見諸世界及諸衆生若成
若壞猶如幻故下半顯示他業謂動地放光等事隨
他所欲自在現故十種自在如十地經說偈曰

神光照惡趣 令信生善道 威力震天宮

動殿令魔怖

釋曰此偈顯示光業光業二種一救苦二怖魔上半偈明救苦謂下照惡道衆生令發信心得生善道故下半偈明怖魔謂上照天宮動魔官殿令魔驚怖故偈曰

遊戲諸三昧 僧中最第一 恒現三種化

以是利衆生

釋曰此偈上半顯示戲業於佛衆中遊戲諸定最得自在下半顯示化業化有三種一業化工巧業處自在化故二隨化隨化所欲自在化故三上化住兜率

天等勝上化故以是三化恒爲利益偈曰

智力普自在 刹土隨欲現 無佛令聞佛

懸擲有佛境

釋曰此偈顯示淨業淨業二種一淨刹土二淨衆生上半偈明淨刹土由智自在隨彼所欲能現水精瑠璃等清淨世界故下半偈明淨衆生於無佛世界能令聞佛起淨信心生有佛處故已說業用次說相應偈曰

成熟衆生力 諸佛所稱譽 發語無不信

如是說相應

釋曰神通相應有三種一生成相應譬如鳥翅初得成就二稱譽相應常得諸佛之所讚歎三信受相應凡所言說人皆信受已說相應次說住神通具偈曰

六智及三明 八解八勝處 十遍諸三昧

勇猛資神通

釋曰菩薩住神通具有六種差別一六智二三明三八解脫四八勝處五十遍入六諸三昧如是六義是分別神通具差別已說住神通具次讚神通大偈曰

能安不自在 常勤於利物 行有無怖畏

勇猛如師子

釋曰菩薩神通有三種大一自在大衆生由煩惱故不得自在菩薩智力能自在安置故二歡樂大由常勤利益衆生一向樂故三無畏大行三有中得極勇猛如師子故神通品究竟

成熟品第九

釋曰已說諸菩薩神通諸菩薩云何自成熟偈曰

欲信捨悲忍 念力堅支具 應知自成熟

此九皆上品

釋曰菩薩有九種自成熟一者欲成熟由希求大法故二者信成熟由淨心說者故三者捨成熟由滅離

煩惱故四者悲成熟由憐愍衆生故五者忍成熟由能行難行故六者念成熟由一切受持故七者力成熟由皆能通達故八者堅成熟由惡魔外道不能奪故九者支成熟由善分圓滿故如此九種窮最上位是名成熟相此九成熟一一有因有體有業今當說偈曰

近友聞亦思 勝勇勝究竟 攝法及受法

說欲成熟相

釋曰親近善友聽聞正法如法思惟此三能起大欲是名欲因上大精進一切不思議處究竟無疑是名

欲體於大乘法有災橫處則能守護菩薩所說信心領受是名欲業偈曰

如來福智聚 淨心不可壞 速受定智果

說信成熟相

釋曰婆伽婆如是廣說是名信因得不壞淨是名信體得定智果是名信業偈曰

善護於六根 離惡起對治 樂修諸善法

說捨成熟相

釋曰以念猗等善護六根是名捨因離不善覺起無間道是名捨體一切善法恒樂修習是名捨業偈曰

見諸衆生苦 哀憐離小心 受身世間勝

說悲成熟相

釋曰菩薩見衆生苦是名悲因起極憐愍遠離小乘心是名悲體得一切世間勝諸地不退是名悲業偈

曰

持性數修習 極苦能安忍 善根恒樂進

說忍成熟相

釋曰持耐忍謂名門數習成性是名忍因能受極風寒等苦是名忍體隨勝生處恒修善法是名忍業偈

曰

報淨善隨順 極入善惡說 能起大般若

說念成熟相

釋曰得清淨器是名念因隨所聞說善惡二義聞思修已深了不忘是名念體能生出世般若名念業

偈曰

二聚界圓滿 果起依最上 世間得第一

說力成熟相

釋曰福智二聚種子充滿是名力因能得最上依止是名力體世間第一隨意成熟是名力業偈曰

深觀妙法理 諸魔不可奪 能與異部過

說堅成熟相

釋曰妙法道理作心觀察是名堅固惡魔波旬不能障礙是名堅體能與他部而作過失是名堅業偈曰
所有善根聚 依勤能發起 離惡及修善

說支成熟相

釋曰彼成熟善根聚是名支因依此因能發起上精進是名支體離諸不善樂修勝善是名支業偈曰
如此九種物 自熟亦熟他 增善增法身

如世極親者

釋曰欲等九物能自成熟亦成熟他常增長一切善

根及增長法身由此二種增故如似世間第一親者

已說菩薩自得成熟次說菩薩成熟衆生偈曰

癡熟則堪治 食熟則堪噉 衆生熟亦爾

二分捨用故

釋曰二分者一障分二治分障熟須捨如癡熟須潰治熟須用如食熟須噉是名成熟依止已說成熟依止次說成熟差別偈曰

捨普勝隨善 得常漸爲八 如此諸成熟 是說差別種

釋曰成熟他相有八種一者捨成熟令滅煩惱故二

者普成熟化以三乘故三者勝成熟過外道法故四者隨成熟應機說故五者善成熟心恭敬故六者得成熟令不倒解故七者常成熟令永不退故八者漸成熟令次第增長故已說成熟差別次說成熟心勝偈曰

利子及利親 利己三利勝 菩薩利一切

過彼勝無比

釋曰譬如世人安樂自子安樂自親安樂自身此心最勝菩薩普欲成熟一切衆生過彼三心不可爲比是故菩薩成熟衆生其心最勝問此勝云何成立偈

曰

世間不自愛 何況能愛他 菩薩自愛捨

但爲愛他故

釋曰世人雖欲自愛尚不能自安利處況能愛他安他利處菩薩不爾捨於自愛但爲愛他是故成熟衆生勝過於彼問用此心勝云何成熟偈曰

身財一切捨 平等及無厭 所乏令充足

安立於善根

釋曰此偈顯示檀波羅蜜成熟衆生檀有三種一資生檀內外身財一切捨故二平等檀於諸施田離高

下故三無厭檀勇猛恒施不疲倦故以是三檀二世
隨攝於現在世皆令充足於未來世安立善根偈曰
常與性及滿 自樂不放逸 引入於戒足
二果常無盡

釋曰此偈顯示尸波羅蜜成熟衆生菩薩有五種尸
羅一者常尸羅生生常有故二者自性尸羅無功用
心住真實體故三者圓滿尸羅十善業道皆具足故
如十地經說四者自樂尸羅恒自愛樂故五者不放
逸尸羅念念無犯故以是五種尸羅二世隨攝於現
在世安立戒品於未來世令依報二果功德無絕偈

曰

不益得益想 極忍解方便 令彼起隨順
及種諸善根

釋曰此偈顯示屢提波羅蜜成熟衆生若他以不饒
益事來向菩薩菩薩於彼得饒益解起極忍辱何以
故由彼隨順令我忍波羅蜜得增長故亦以是忍二
世隨攝於現在世令起歸向於未來世令種善根偈
曰

久劫行上勤 利物心無退 令生一念善
況欲善無量

論

大佛生嚴聖命卷第二

七

釋曰此偈顯示毗梨耶波羅蜜成熟衆生菩薩於億百千劫行最上精進爲成熟無邊衆生心無退轉以是精進二世隨攝於現在世但令得生一念善心況於未來令無量善根皆得增益偈曰

得上自在禪 離染及見慢 現在令歸向
未來善法增

釋曰此偈顯示禪波羅蜜成熟衆生菩薩所得禪定遠離愛見慢等故自在最上以是禪定二世隨攝於現在世令歸向第一妙法於未來世令增長一切善根偈曰

知真及知意 能斷一切疑 於法令恭敬
自他功德滿

釋曰此偈顯示般若波羅蜜成熟衆生知真者解法不顛倒故知意者了達衆生心行斷彼疑故以是般若二世隨攝於現在世令向大法深生恭敬於未來世令彼自身功德及他身功德皆得圓滿偈曰

善趣及三乘 大悲有三品 盡於未來際
如是熟衆生

釋曰此偈顯示大成熟相有三種一者位大謂窮四位安立善道及以三乘二者品大悲極三品下者信

行地中者初地至七地上者八九十地三者時大時節無邊盡未來際菩薩如是利益衆生是名大成熟相成熟品究竟

大乘莊嚴經論卷第二

音釋

猗於宜切癰於容切潰胡對切羸初眼切

大乘莊嚴經論卷第三

無 著 菩 薩 造
唐三藏波羅頗迦羅蜜多羅譯

菩提品第十

釋曰已說菩薩成熟衆生次說菩薩得一切種智偈

曰

一切難已行 一切善已集 一切時已度
一切障已斷

釋曰此偈顯一切種智因圓滿一切難已行者由具足行無量百千種難行行未曾疲倦故一切善已集

者由具足聚集諸波羅蜜自性善根故一切時已度
者由具足經長時大劫阿僧祇故一切障已斷者由
具足斷一切大乘障謂諸地所有微細障故偈曰
成就一切種 此卽爲佛身 譬如大篋開
衆寶無不現

釋曰此偈顯一切種智果圓滿有三義分別一至得
二自性三譬喻成就一切種者謂至得分別從此已
後成就一切種智故此卽爲佛身者謂自性分別卽
說一切種智爲佛身體故譬如大篋開衆寶無不現
者謂譬喻分別不可思議菩提分寶皆現前故已說

一切種智爲佛身次說此身無二相偈曰

白法爲佛身 非無亦非有 佛爲法寶因
法則善根因

釋曰白法爲佛身者轉六波羅蜜等一切善法爲佛
體故非無亦非有者此體非無何以故真如無別故
亦復非有何以故自性不成就故是名無二相佛爲
法寶因者佛說一切法故及以神通力故法則善根
因者衆生爲田善根爲穀如是法寶於所化衆生田
生長善根穀故偈曰

具法亦離法 如藏亦如雲 生法雨法雨

故成如是譬

釋曰此偈重顯前義具法亦離法者諸佛具足一切善法故遠離一切不善法故如藏亦如雲者佛寶如藏法寶如雲問此以何義答生法雨法雨故成如是譬佛寶能出生法寶與大藏相似法寶能生長一切衆生善根與大雲相似已說佛身無二相次說是無上歸依偈曰

諸佛常救護 衆生三染汗 諸惑諸惡行 及以生老死

釋曰此偈略顯救護義諸佛常救護者由畢竟救護故問救護何法答衆生三染汗謂煩惱染汗業染汗生染汗諸惑者卽煩惱染汗諸惡行者卽業染汗及以生老死者卽生染汗問云何救護答於此三種衆生一切時救護不捨卽是畢竟義偈曰

諸災及惡趣 身見亦小乘 如是諸衆生 一切皆救護

釋曰此偈廣顯救護義諸災者謂盲聾瘖瘂狂亂形殘等衆生由佛力故盲者得視聾者得聽瘖者能言狂者得正亂者得定形殘者得具足如是救護惡趣者謂地獄等衆生放光照觸令得離苦不復更入如

是救護身見者謂著我衆生令得人無我解入二乘
涅槃如是救護小乘者謂二乘性不定衆生方便引
入大乘如是救護偈曰

佛爲勝歸處 無比故無上 如前種種畏

無不令脫者

釋曰此偈顯歸依勝由佛無譬喻故爲無上是故如
前所說三種染汙衆生及餘災等衆生一切皆能救
護偈曰

諸佛善滿身 一切世間勝 妙法化衆生
以度悲海故

釋曰此偈顯歸依勝因諸佛善滿身一切世間勝者
此由自利究竟由力無畏等諸善功德自性滿故妙
法化衆生以度悲海故者善解教化衆生方便及度
大悲海岸究竟故偈曰

盡於未來際 普及一切生 恒時利益彼
是說歸依大

釋曰此偈顯歸依大有三義一者時大窮一切衆
生生死際故二者境大以一切衆生爲境故三者事
大恒時作利益救脫其苦令出離故已說無上歸依
次說如來轉依相偈曰

二障種恒隨 彼滅極廣斷 白法圓滿故
依轉二道成

釋曰此偈顯示轉依有離有得二障種恒隨彼滅極廣斷者此明所治遠離謂煩惱障智障二種種子無始已來恒時隨逐今得永滅極者一切地廣者一切種此皆斷故白法圓滿故依轉二道成者此明能治成就謂佛體與最上圓滿白法相應爾時依轉得二道成就一得極清淨出世智道二得無邊所識境界智道是名轉依偈曰

彼處如來住 不動如山王 尚悲樂滅人

況著諸有者

釋曰此偈顯示如來轉依諸轉中勝何以故如來轉依住無漏界處如山王鎮地安住不動如此轉已見於聲聞緣覺樂寂滅人尚生憐愍何況遠邊下賤著有苦惱眾生偈曰

他利及無上 不轉及不生 廣大與無二
無住亦平等 殊勝與遍授 是說如來轉
顯示十功德 差別義應知

釋曰此二偈顯示如來轉依有十種功德差別何等爲十一者他義轉謂轉依已爲利他故二者無上轉

謂轉依已一切法中而得自在過二乘轉故三者不轉轉謂轉依已染汙諸因不能轉此依彼依轉故四者不生轉謂轉依已一切染汙法畢竟不起故五者廣大轉謂轉依已示現得大菩提及般涅槃故六者無二轉謂轉依已生死涅槃無有二故七者不住轉謂轉依已有爲無爲俱不住故八者平等轉謂轉依已與聲聞緣覺同解脫煩惱障故九者殊勝轉謂轉依已力無畏等一切佛法無與等故十者遍授轉謂轉依已恒以一切乘而教授故偈曰

如空遍一切 佛亦一切遍 虛空遍諸色

諸佛遍衆生

釋曰此偈顯示佛體一切遍與虛空相似初二句直說後二句釋說譬如虛空遍一切色聚佛體亦爾遍一切衆生聚若以衆生現非佛故言佛體不遍者是義不然未成就故偈曰

譬如水器壞 月像不現前 如是衆生過 佛像亦不現

釋曰此偈顯示佛體雖遍而衆生不見譬如水器破壞不見月像如是衆生過失不見佛像此義得成偈曰

譬如火聚性 或然或滅盡 如是諸佛化
或出或涅槃

釋曰此偈顯示諸佛教化有出有沒譬如火性有時
熾然有時滅盡諸佛教化亦復如是有時示現出世
有時示現涅槃如是已說如來轉依次說如來事業
恒無功用偈曰

意珠及天鼓 自然成自事 佛化及佛說
無思亦如是

釋曰此偈顯示佛事無功用譬如如意寶珠雖復無
心自然能作種種變現如來亦爾雖復無功用心自

然能起種種變化譬如天鼓雖復無心自然能出種
種音聲如來亦爾雖復無功用心自然能說種種妙
法偈曰

依空業無間 而業有增減 依界事不斷
而事有生滅

釋曰此偈顯示佛事無間譬如世間依空所作無時
斷絕諸佛亦爾依無漏界而作佛事亦無斷絕譬如
世間依空所作有增有減諸佛亦爾依無漏界而作
佛事亦有生滅已說無功用心不捨佛事次說無漏
法界甚深偈曰

如前後亦爾 及離一切障 非淨非不淨

佛說名爲如

釋曰此偈顯示法界清淨相如前後亦爾者所謂非淨由自性不染故及離一切障者所謂非不淨由後時客塵離故非淨非不淨佛說名爲如者是故佛說是如非淨非不淨是名法界清淨相偈曰

清淨空無我 佛說第一我 諸佛我淨故

故佛名大我

釋曰此偈顯示法界大我相清淨空無我者此無漏界由第一無我爲自性故佛說第一我者第一無我

謂清淨如彼清淨如卽是諸佛我自性諸佛我淨故故佛名大我者由佛此我最得清淨是故號佛以爲大我由此義意諸佛於無漏界建立第一我是名法界大我相偈曰

非體非非體 如是說佛體 是故作是論

定是無記法

釋曰此偈顯示法界無記相非體者人法二相不可說故非非體者如相實有故如是說佛體者由此因緣故說佛體非體非非體是故作是論定是無記法者無記謂死後有如來死後無如來死後亦有如來

亦無如來死後非有如來非無如來如是四句不可
記故是故法界是無記相偈曰

譬如鐵熱息 譬如眼翳除 心智息亦爾
不說有無體

釋曰此偈顯示法界解脫相譬如鐵熱息譬如眼翳
除者如是二物熱息翳除可說非體非非體何以故
非體者由熱翳無相故非非體者由息相有體故心
智息亦爾不說有無體者諸佛心智以貪爲熱以無
明爲翳彼二若息亦說非體非非體何以故非體者
由貪及無明息故非非體者由心慧解脫有故是名
法界解脫相已說相甚深次說處甚深偈曰

諸佛無漏界 非一亦非多 前身隨順故
非身如空故

釋曰此偈顯示法界處甚深諸佛無漏法界非一亦
非多何以故非一者由前身隨順故非多者由非身
故問云何非身答如虛空故是名法界處甚深已說
處甚深次說業甚深偈曰

譬如大寶藏 衆寶之所依 淨界亦如是
佛法之依止

釋曰此偈顯示法界依止業由清淨法界爲力無畏

等諸菩提分寶所依止故偈曰

譬如密雲布 灑雨成百穀 淨界亦如是

流善熟衆生

釋曰此偈顯示法界成熟衆生業由從清淨法界流諸善根成熟衆生故偈曰

譬如日月盈 皎淨輪圓滿 淨界亦如是

善淨聚圓滿

釋曰此偈顯示法界到究竟業聚諸福智由清淨法界如此二聚得圓滿故偈曰

譬如日輪出 流光照一切 淨界亦如是

流說化羣生

釋曰此偈顯示法界說下法業偈曰

譬如日光合 同事照世間 淨界亦如是

佛合同業化

釋曰此偈顯示法界化所作業譬如多日多光一時和合同作一事謂乾熟等如是多佛多智一時和合同作一業謂變化等偈曰

譬如日光照 無限亦一時 淨界佛光照

二事亦如是

釋曰此偈顯示法界無分別業譬如日光普照無有

分限亦復一時如是佛光普照無限一時亦復如是
偈曰

譬如諸日光 說有雲等翳 淨界諸佛智

說有衆生障

釋曰此偈顯示法界不作業譬如日光雲等爲翳是
故不照如是佛光衆生過失爲障五濁多故是故不
有所作偈曰

譬如滋灰力 染衣種種色 淨界行願力

解脫種種智

釋曰此偈顯示法界解脫智業譬如染衣由滋灰力

有處得種種色有處不得種種色三乘淨界亦爾由
行願力諸佛解脫得種種智二乘解脫不得種種智
偈曰

無漏界甚深 相處業三種 諸佛如是說

譬如染畫空

釋曰此偈重顯前甚深義無漏界甚深相處業三種
者此無漏界世尊略說三種甚深一者相甚深二者
處甚深三者業甚深相甚深有四種一清淨相二大
我相三無記相四解脫相如其次第由前四偈所顯
處甚深一種謂一多不住故由第五偈所顯業甚深

有八種一實依止業二成熟衆生業三到究竟業四
說正法業五化所作業六無分別業七智不作業八
解脫智業如其次第由後八偈所顯諸佛如是說譬
如染畫空者此無漏界無有戲論譬如虛空是故甚
深如是甚深差別說者譬如染於虛空畫於虛空是
義應知偈曰

一切無別故 得如清淨故 故說諸衆生

名爲如來藏

釋曰此偈顯示法界是如來藏一切無別故者一切
衆生一切諸佛等無差別故名爲如得如清淨故者

得清淨如以爲自性故名如來以是義故可說一切
衆生名爲如來藏已說無漏界甚深次說諸佛變化
偈曰

聲聞及緣覺 菩薩與如來 初化退世間

至佛退菩薩

釋曰此偈顯示增上變化一切世間變化聲聞變化
能退一切聲聞變化緣覺變化能退一切緣覺變化
菩薩變化能退一切菩薩變化諸佛變化能退無有
一人變化能退諸佛變化是故如來變化最得增上

偈曰

如是佛變化 無量不思議 隨人隨世界

隨時種種現

釋曰此偈顯示甚深變化此甚深有二種一者無量二者不思議問此事云何答隨何根人隨何世界隨何時節如其差別若多若少種種變化如是無量亦不思議是故如來變化最爲甚深自下次說別轉變化偈曰

如是五根轉 變化得增上 諸義遍所作

功德千二百

釋曰此偈顯示轉五根變化此變化得二種增上一

者得諸義遍所作謂一 一根皆能互用一切境界故
二者得功德千二百謂一 一根各得千二百功德故
偈曰

如在意根轉 變化得增上 極淨無分別

恒隨變化行

釋曰此偈顯示轉意根變化意根謂染汙識由此轉故得極淨無分別智恒與一切變化隨行共所作故
偈曰

如是義受轉 變化得增上 淨土如所欲

受用皆現前

釋曰此偈顯示轉義受變化義謂五塵受謂五識由此二轉刹土清淨所欲現前隨意受用偈曰

如是分別轉 變化得增上 諸智所作業
恒時無礙行

釋曰此偈顯示轉分別變化分別謂意識由此轉故諸智所作一切時變化無所障礙偈曰

如是安立轉 變化得增上 住佛不動句
不住於涅槃

釋曰此偈顯示轉安立變化安立謂器世界由此轉故住佛不動無漏法界得不般涅槃恒起增上變化

偈曰

如是欲染轉 變化得增上 住佛無上樂
示現妻無染

釋曰此偈顯示轉欲染變化由此轉故得二種變化一者得無上樂住二者得於妻無染偈曰

如是空想轉 變化得增上 隨欲一切得
所去皆無擁

釋曰此偈顯示轉空想變化由此轉故得二種變化一者所欲皆得得虛空藏故二者所去無擁得虛空解故偈曰

如是無量轉 如是無量化 不思議所作
諸佛依無垢

釋曰此偈總結前義由無量轉故得無量變化如是
諸佛不思議業一切皆依無漏法界是義應知已說
諸佛變化次說諸佛成熟衆生偈曰

令集亦令長 令熟亦令脫 熟熟不無餘
世間無盡故

釋曰此偈顯示次第成熟因未集善根者令聚集已
集善根者令增長已長善根者令成熟已熟善根者
令解脫使得最極清淨如是十方諸佛各各善說熟

已復熟不般涅槃何以故由諸世間無有盡故偈曰
難得已具得 處處爲物歸 希有非希有
由得善方便

釋曰此偈顯示已熟菩薩行非希有相難得已具得
處處爲物歸者無上菩提最上功德此未曾有今已
具足相應由此相應故能恒於十方世界爲物歸處
希有非希有者如是處處成熟衆生是爲希有如此
希有亦非希有何以故由得善方便故善方便者謂
隨機道卽是清淨行偈曰

轉法及法沒 得道亦涅槃 處處方便起

不動真法界

釋曰此偈顯示普遍成熟因轉法及法沒得道亦涅槃者謂於一刹那中有處示現轉無量法輪有處示現正法滅盡有處示現得大菩提有處示現入於涅槃此由衆生行不同故處處方便起不動真法界者若衆生應可成熟如來隨彼住處處教化然於無漏法界亦復不動偈曰

不起分別意 成熟去來今 處處化衆生

三門常示現

釋曰此偈顯示自然成熟因不起分別意成熟去來

今者一切諸佛不作是念我曾成熟衆生我當成熟衆生我今成熟衆生何以故由無分別故處處化衆生三門常示現者雖無功用而一切時以諸善根於十方世界遍以三門成熟衆生三門者謂三乘教門故偈曰

如日自然光 照闇成百穀 法日光亦爾

滅惑熟衆生

釋曰此偈譬顯自然義譬如日輪無勤方便自然放光處處破闇成熟百穀諸佛亦爾雖無功用以法日光處處滅惑成熟衆生偈曰

一燈然衆燈 極聚明無盡 一熟化多熟
無盡化亦然

釋曰此偈顯示展轉成熟因譬如一燈傳然衆燈極大燈聚無量無數而一燈無盡諸佛亦爾一佛成熟化多成熟極大衆生聚無量無數然其化力亦復無盡偈曰

巨海納衆流 無厭復無溢 佛界攝衆善
不滿亦不增

釋曰此偈顯示無厭成熟因譬如巨海廣納百川無有厭足亦無盈溢爲容受故佛界亦爾常攝無量清淨善根而不滿足亦不增長由希有故已說諸佛成熟衆生次說諸佛法界清淨偈曰

二障已永除 法如得清淨 諸物及緣智
自在亦無盡

釋曰此偈顯示法界性義二障已永除法如得清淨者謂清淨相由煩惱障及智障悉永盡故諸物及緣智自在亦無盡者謂自在相由於諸物及緣彼智二種自在永無盡故偈曰

一切種如智 修淨法界因 利樂化衆生
此果亦無盡

釋曰此偈顯示法界因義一切種如智修淨法界因者謂爲清淨法界於一切時修一切種如門智以爲因故利樂化衆生此果亦無盡者謂爲教化衆生於一切時與一切衆生利樂二果恒無盡故偈曰

發起身口心 三業恒時化 二門及二聚 方便悉圓滿

釋曰此偈顯示法界業義發起身口心三業恒時化者謂起身業口業心業一切時教化衆生故二門及二聚方便悉圓滿者謂具足二門二聚爲方便故二門謂三昧門陀羅尼門二聚謂福德聚智慧聚偈曰

自性及法食 變化位差別 此由法界淨

諸佛之所說

釋曰此偈顯示法界位義自性及法食變化位差別者謂自性身食身化身位差別故此由法界淨諸佛之所說者若法界不清淨此位不成故已說諸佛法界清淨次說諸佛三身偈曰

性身及食身 化身合三身 應知第一身 餘二之依止

釋曰一切諸佛有三種身一者自性身由轉依相故二者食身由於大集衆中作法食故三者化身由作

所化衆生利益故此中應知自性身爲食身化身依止由是本故偈曰

食身於諸界 受用有差別 衆生名身業

一切皆異故

釋曰食身於一切世界中諸徒衆諸刹土諸名號諸身諸業如此諸受用事悉皆不同偈曰

平等微細身 受用身相合 應知受用身

復是化身因

釋曰平等謂自性身一切諸佛等無別故微細者由此身難知故受用身謂食身此身與平等身合由依

起故應知受用身復是化身因者由所欲受用一切

示現故偈曰

化佛無量化 是故名化身 二身二利成

一切種建立

釋曰由化身諸佛於一切時化作無量差別佛由此化故名爲化身二身者謂食身化身二利者謂自利他利食身以自利成就爲相化身以他利成就爲相如此二利一切種成就故次第建立食身及化身偈曰

工巧及出生 得道般涅槃 示此大方便

令他得解脫

釋曰復次化身者於一切時教化衆生或現工巧或現出生或現得菩提或現般涅槃如是種種示大方便皆令衆生而得解脫此是他利成就相偈曰

應知佛三身 是佛身皆攝 自他利依止
示現悉三身

釋曰應知此三身攝一切諸佛身示現一切自利利他依止故偈曰

由依心業故 三佛俱平等 自性無間續
三佛俱常住

釋曰彼三種身如其次第一切諸佛悉皆平等由依故一切諸佛自性身平等法界無別故由心故一切諸佛食身平等佛心無別故由業故一切諸佛化身平等同一所作故復次一切諸佛悉同常住由自性常故一切諸佛自性身常住畢竟無漏故由無間常故一切諸佛食身常住說法無斷絕故由相續常故一切諸佛化身常住雖於此滅復彼現故已說諸佛身次說諸佛智偈曰

四智鏡不動 三智之所依 八七六五識
次第轉得故

釋曰四智鏡不動三智之所依者一切諸佛有四種
 智一者鏡智二者平等智三者觀智四者作事智彼
 鏡智以不動為相恒為餘三智之所依止何以故三
 智動故八七六五識次第轉得故者轉第八識得鏡
 智轉第七識得平等智轉六識得觀智轉第五識得
 作事智是義應知偈曰

鏡智緣無分 相續恒不斷 不愚諸所識
 諸相不現前

釋曰此偈顯示轉第八識得鏡智鏡智緣無分者於
 一切境界不作分段緣故相續恒不斷者於一切時

常行不斷絕故不愚諸所識者了知一切境界障永
 盡故諸相不現前者於諸境界離行相緣無分別故
 偈曰

鏡智諸智因 說是大智藏 餘身及餘智
 像現從此起

釋曰此偈顯示鏡智用鏡智諸智因說是大智藏者
 彼平等智等諸智一切種皆以鏡智為因是故此智
 譬如大藏由是諸智藏故餘身及餘智像現從此起
 者餘身謂受用身等餘智謂平等智等由彼身像及
 彼智像一切皆從此智出生是故佛說此智以為鏡

智偈曰

衆生平等智 修淨證菩提 不住於涅槃
以無究竟故

釋曰此偈顯示轉第七識得平等智衆生平等智修淨證菩提者若諸菩薩證法現前時即得一切衆生平等智若修習此智最極清淨即得無上菩提不住於涅槃以無究竟故者由衆生無盡故無究竟無究竟故不住涅槃由此義故說爲平等智偈曰

大慈與大悲 是二恒無絕 衆生若有信
佛像即現前

釋曰此偈顯示平等智用大慈與大悲是二恒無絕者諸佛如來於一切時隨逐衆生何以故大慈大悲無斷絕故衆生若有信佛像即現前者如其所信隨彼現故是故或有衆生見如來青色或有衆生見如來黃色如是一切此前二智即是法身偈曰

觀智識所識 恒時無有礙 此智如大藏
總持三昧依

釋曰此偈顯示轉六識得觀智觀智於所識一切境界恒無障礙譬如大藏與一切陀羅尼門一切三昧門而爲依止何以故如是二門皆從此智生故偈曰

恒在大衆中 種種皆示現 能斷諸疑網
雨大法雨故

釋曰此偈顯示觀智用義如偈說此觀智卽是食身
偈曰

事智於諸界 種種化事起 無量不思議

爲利羣生故

釋曰於偈顯示轉第五識得作事智彼作事智於一
切世界中亦種種變化事無量無邊不可思議如此
等業皆爲利益一切衆生故此作事智卽是化身偈
曰

攝持及等心 開法亦作事 如是依四義

次第四智起

釋曰攝持者謂聞法攝持故等心者謂於一切衆生
得自他平等故開法者謂演說正法故作事者謂起
種種化業故依第一義鏡智起依第二義平等智起
依第三義觀智起依第四義作事智起偈曰

性別及不虛 一切亦無始 無別故不一
依同故不多

釋曰此偈顯示諸佛不一不多不一者由性別故不
虛故一切故無始故無別故性別者由無邊諸佛性

別若言唯有一佛而有當得菩提者是義不然故佛不一不虛者若福智聚虛則應餘菩薩不得菩提由二聚不虛故是義不然故佛不一一切者若言唯有一佛則應是佛不利益一切衆生由佛建立一切衆生作佛故是義不然故佛不一無始者若言唯有最初一佛是佛應無福智二聚而成佛是義不然故佛不一無別者若言有別佛無福智二聚是義不然故佛不一不多者由依同故一切諸佛法身由依無漏界故已說諸佛智次說入佛方便偈曰

分別若恒有 真實則永無 分別若永無

真實則恒有

釋曰若分別自性是恒有則真實自性是永無由不可得故若分別自性是永無則真實自性是恒有由可得故偈曰

欲修最上修 不見一切修 欲得最上得 不見一切得

釋曰彼如是最上修彼修不可得彼如是最上得彼得不可得偈曰

尊重及長時 觀佛希有法 緣此速得佛 去佛菩提遠

釋曰若有菩薩於佛世尊極生尊重及長時正勤觀
佛未曾有法緣此觀心及長時精進而謂我當速得
無上菩提應知如是菩薩去佛菩提則爲甚遠何以
故彼有慢故偈曰

觀法唯分別 此義如前知 菩薩無分別
說彼速成佛

釋曰若菩薩觀一切諸法唯是分別觀彼分別亦無
分別卽得入彼無生忍位由如此義說得菩提已說
入佛方便次說諸佛同事偈曰

應知諸河水 別依亦別事 水少蟲用少

未入大海故 一切入大海 一依亦一事

水大蟲用大 亦復常無盡 如是諸別解

別意亦別業 解少利亦少 未入佛體故

一切入佛體 一解亦一意 解大利益大

極聚亦無盡

釋曰別水譬諸菩薩別解別依譬諸菩薩別意一水
譬諸如來一解一依譬諸如來一意由諸河水別故
水事業亦別由水少故水蟲受用亦少何以故未得
同入大海故諸菩薩亦爾由解別故作業亦別由解
少故利益衆生亦少何以故未得同入佛體故諸水

若入大海卽同一依卽同一體由水一故事業亦一
 由水大故水蟲受用亦大若諸菩薩同入佛體卽同
 一意卽同一解由解一故作業亦一由解大故利益
 亦大極一切衆生聚亦無有盡如是已說諸佛體用
 次說一偈勸進希求偈曰

無比圓白法 眾生利樂因 樂住無盡藏

智者應求發

釋曰無比圓白法者由佛自利成就故眾生利樂因
 者由佛利他成就故樂住無盡藏者由佛善根無過
 無上是無盡樂藏故智者應求發求者有智之人應

求如此最勝樂住而發大菩提心故菩提品究竟

大乘莊嚴經論卷第三 終



大乘莊嚴經論卷第三
釋曰已說無上菩提隨順菩提者所謂信此信相今

大乘莊嚴經論卷第四

無著菩薩造

唐三藏波羅頗迦羅蜜多羅譯

明信品第十一

釋曰已說無上菩提隨順菩提者所謂信此信相今
當說偈曰

已生及未生 正受及似受 他力亦自力

有迷亦不迷 現前不現前 聽法及求義

觀察等十三 分別於信相

釋曰信相差別有十三種一者已生信謂過去現在

論
信二者未生信謂未來信三者正受信謂內信四者似受信謂外信五者他力信謂麤信由善友力生故六者自力信謂細信由自力生故七者有迷信謂惡信由顛倒故八者不迷信謂好信由無倒故九者現前信謂近信由無障故十者不現前信謂遠信由有障故十一者聽法信謂聞信由聞生故十二者求義信謂思信由思生故十三者觀察信謂修信由修生故已說信相差別次說信種差別偈曰

可奪間無間 有多亦有少 有覆及無覆
相應不相應 有聚亦無聚 極入亦遠入

復此十三義 分別於信種

釋曰信種差別亦有十三一者可奪信謂下品信二者有間信謂中品信三者無間信謂上品信四者多信謂大乘信五者少信謂小乘信六者有覆信謂有障信由不能勝進故七者無覆信謂無障信由能勝進故八者相應信謂熟修信由恒行及恭敬行故九者不相應信謂不熟修信由離前二行故十者有聚信謂有果信由能得大菩提故十一者無聚信謂無果信由不能得大菩提故十二者極入信謂功用信從初地至七地故十三者遠入信謂極淨信從八地

至佛地故已說信種次說信障難偈曰

多忘亦懈怠 行迷并惡友 善羸及邪憶

放逸復少聞 聞喜及思喜 因定增上慢

應知此等過 障礙於信相

釋曰障者相違義多忘者於已生信爲障懈怠者於未生信爲障行迷者於正受似受信爲障如先所受能受執者故惡友者於他力信爲障以倒法令受故善羸者於自力信爲障邪憶者於不迷信爲障放逸者於現前信爲障少聞者於聽法信爲障不聽了義故聞喜者於求義信爲障少思惟故思喜及定慢者

於觀察信爲障少修及不細觀察故問何障障信種偈曰

不厭及不習 有厭亦有覆 無應及無聚

應知障信種

釋曰不習者於可奪信有聞信爲障不厭者於小信爲障不厭生死故有厭者於大信爲障厭生死故有覆者於無覆信爲障無應者於相應信爲障無聚者於有聚信爲障已顯示信障難次讚歎信功德偈曰
信有大福德 不悔及大喜 不壞將堅固
進位并得法 自利與他利 亦復速諸通

以此諸功德 讚歎信利益

釋曰大福德者讚現在信不悔者讚過去信不追變故大喜者讚正受信及似受信定相應故不壞者讚友力信正道不壞故堅固者讚自力信不退捨故進位者讚不迷信現前信聽法信求義信觀察信有聞信得法者讚無間信自利者讚少信他利者讚多信速通者讚諸白分信謂無覆信相應信者聚信極入信遠入信偈曰

狗龜奴王譬 次第譬四信 習欲習諸定

自利利他人

釋曰譬如餓狗求食無厭諸習欲人信亦復如是於一切時種種信故譬如盲龜水中藏六諸習外定人信亦復如是唯知修習世間定故譬如賤奴畏主勤作諸自利人信亦復如是爲怖生死勤方便故譬如大王自在詔敕諸利他人信亦復如是增上教化無休息故菩薩自解諸信復廣分別令他得解如是勸諸衆生生大乘信已讚信功德次遮下劣心偈曰

人身及方處 時節皆無限 三因菩提得
勿起下劣心

釋曰人身及方處時節皆無限者得無上菩提有三

因無限一者人身無限由人道衆生得無限故二者
方處無限由十方世界得無限故三者時節無限由
盡未來際刹那刹那得無限故三因菩提得勿起下
劣心者由此三因無限是故諸菩薩於無上菩提不
應退屈起下劣心已遮下劣心次顯福德勝偈曰

得福由施彼 非由自受用 依他說大乘
不依自義法

釋曰得福由施彼非由自受用者譬如以食施彼則
得大福由利他故非自受用能得大福由自利故問
若爾菩薩云何得福答依他說大乘不依自義法諸

菩薩如是依他說大乘經得大福德不依自利說小
乘經得大福德已說勝福次說得果偈曰

大法起大信 大信果有三 信增及福增
得佛功德體

釋曰大法起大信大信果有三者謂有智人於大乘
聖法而生大信由此大信得三種果問得何等果答
信增及福增得佛功德體此明一得大信果信增長
故二得大福果福增長故三得大菩提果功德無等
及佛體大故明信品究竟
述求品第十二之一

釋曰如是已說種種信次說以信求諸法偈曰

三藏或二攝 成三有九因 熏覺寂通故
解脫生死事

釋曰三藏或二攝者三藏謂修多羅藏毗尼藏阿毗曇藏或二謂此三由下上乘差別故復說爲聲聞藏及菩薩藏問彼三及二云何名藏答由攝故謂攝一切所應知義問云何成三答成三有九因立修多羅者爲對治疑惑若人於義處處起疑爲令彼人得決定故立毗尼者爲對治受用二邊爲離樂行邊遮有過受用爲離苦行邊聽無過受用立阿毗曇者爲對

治自心見取不倒法相此能示故復次立修多羅者爲說三學立毗尼者爲成戒學心學由持戒故不悔由不悔故隨次得定立阿毗曇者爲成慧學不顛倒義此能擇故復次立修多羅者爲正說法及義立毗尼者謂成就法及義由勤方便煩惱滅故立阿毗曇者爲通達法及義由種種簡擇此爲方便故由此九因故立三藏問別用如此通用云何答熏覺寂通故解脫生死事此明解脫生死是其通用由聞故熏由思故覺由止故寂由觀故通由此四義生死諸事大得解脫偈曰

經律阿毗曇 是各有四義 具解成種智

一偈得漏盡

釋曰若略說三藏一一各有四義若菩薩能了此義則成就一切種智若聲聞能了一偈則得諸漏永盡問云何一一四種義偈曰

依故及相故 法故及義故 如是四種義

是說多羅義

釋曰修多羅有此四義一依二相三法四相依者是處是人是用謂隨是何國土隨是何諸佛隨是何眾生如來依此三種說修多羅相者謂世諦相及第一

義諦相法者謂陰界入緣生諦食等法義者謂釋所以偈曰

對故及數故 伏故及解故 如是四種義

是說毗曇義

釋曰阿毗曇有此四義一對二數三伏四解對者是向涅槃法諦菩提分解脫門等說故數者是相續法於一一法色非色可見不可見等差別無量說故伏者是勝上法於諍論衆中決判法義退彼說故解者是釋義法由阿毗曇修多羅義易可解故偈曰

罪起淨出故 人前解判故 四義復四義

是說毗尼義

釋曰毗尼有二種四義初四義者一罪二起三淨四出罪者罪自性謂五聚罪起者罪緣起此有四種一無知二放逸三煩惱疾利四無恭敬心淨者罪還淨由善心不由治罰出者罪出離此有七種一者悔過謂永遮相續二者順教謂與學羯磨治罰三者開許謂先時已制後時更開四者更捨謂僧和合與學者捨是時先犯還得清淨五者轉依謂比丘比丘尼男女轉根出不共罪六者實觀謂法優陀那由勝觀察七者性得謂見諦時細罪無體由證法空法爾所得

復四義者一人二制三解四判人者謂犯罪人制者謂依彼犯人大師集眾說彼過失制立學足解者謂如所制更廣分別判者謂云何得罪云何不得罪如是應持已說求法次說求緣偈曰

佛說所緣法 應知內外俱 得二無二義

二亦不可得

釋曰佛說所緣法應知內外俱者佛說一切所緣法有三種一內二外三俱彼能取自性身等為內所取自性身等為外合二自性為俱得二無二義二亦不可得者於此內外二緣如其次第得無二義問云何

得答若所取義與能取義無別觀若能取義與所取義無別觀復次合二爲一由於內外二緣得如如故如是彼二無有二義則此二緣亦不可得問已說得緣云何得智偈曰

三緣得三智 淨持意言境 了別義光已
安心唯有名

釋曰三緣謂如前說內外俱三境三智謂聞思修三慧由依三緣能得三慧問云何得答若於三緣淨持意言境即得聞慧意言者分別也淨者信決定持者擇彼種由此得聞慧若於三緣了別義光已即得思

慧謂知義及光不異意言由此得思慧若於三緣安心唯有名即得修慧謂知義及光但唯是名由此得修慧如先所說二緣不可得是故應知彼三緣者是聞思修三慧依止已說求緣次說求作意偈曰

最初謂種性 所作及依止 信安及欲生
依定亦依智 別緣種種緣 通達及修種
自性與功力 領受及方便 自在小大等
如有十八 盡攝諸作意 行者應勤修

釋曰十八種作意者一種性作意二所作作意三依止作意四信安作意五欲生作意六依定作意七依

智作意八別緣作意九種種緣作意十通達作意十一
一修種作意十二自性作意十三功力作意十四領
受作意十五方便作意十六自在作意十七小作意
十八大作意種性作意者由聲聞等三乘性定故所
作作意者由福智二聚圓滿故依止作意者由在家
出家迫迫不迫迨差別故信安作意者念佛相應故
欲生作意者隨念佛時信心相應故依定作意者有
覺有觀等三三昧相應故依智作意者從聞思修方
便次第生故別緣作意者此有五種於修多羅優陀
那伽陀阿波陀那一受二持三讀四思五說故種種

緣作意者此有七種名緣句緣字緣人無我緣法無
我緣色緣無色緣色緣謂身緣無色緣謂受心法緣
通達作意者此有四種一通達物謂知苦體二通達
義謂知苦無常空無我義三通達果謂知解脫四通
達覺謂知解脫智修種作意者此有四種修及三十
七種修四種修者謂人無我種修法無我種修見種
修智種修三十七種修者謂不淨苦無常無我四種
修是名四念處種修復次得習斷對治四種修是名
四正勤種修復次爲對治知足亂疑掉動沉沒四障
故欲進念慧四種修是名四神足種修復次住心者

爲成就出世間故起信勤不忘心住簡擇五種修是名五根種修復次如是五修能治五障卽名爲力是名五力種修復次於菩提正憶簡擇勇猛慶悅調柔心住平等七種修是名七覺分種修復次得決定故成淨持地業思惟分別故聖所受三戒能持故先所得道勤習故法住相不忘故無相心住轉依故如是八種修是名八道分種修自性作者此有二種一奢摩他二毗鉢舍那此二是道自性故功力作者力有二種一拔除熏習二拔除相見領受作者諸佛菩薩教授所有法流悉受持故方便作者於定

所行處方便有五一解數方便於名句字數悉通達故二解具方便具有二種一分量具所謂諸字二非分量具所謂名句等三解分別方便分別二種一依名分別義二依義分別名非分別者字也四解次第方便謂先取名後轉取義五解通達方便通達有十一種一通達客塵二通達境光三通達義不可得四通達不可得不可得五通達法界六通達人無我七通達法無我八通達下劣心九通達高大心十通達所得法十一通達所立法自在作者自在三種一惑障極清淨二感智二障極清淨三功德極清淨小

作意者謂初清淨大作意者謂後二清淨已說求作
意次說求真實義偈曰

離二及迷依 無說無戲論 三應及二淨

二淨三譬顯

釋曰離二及迷依無說無戲論者此中應知三性俱
是真實離二者謂分別性真實由能取所取畢竟無
故迷依者謂依他性真實由此起諸分別故無說無
戲論者謂真實性真實由自性無戲論不可說故三
應及二淨二淨三譬顯者三應謂初真實應知第二
真實應斷第三真實應淨二淨謂一者自性清淨由

本來清淨故二者無垢清淨由離客塵故此二清淨
由三種譬喻可得顯現謂空金水如此三譬一則俱
譬自性清淨由空等非不自性清淨故二則俱譬無
垢清淨由空等非不離客塵清淨故偈曰

法界與世間 未曾有少異 衆生癡盛故
著無而棄有

釋曰法界與世間未曾有少異者非法界與世間而
有少異何以故法性與諸法無差別故衆生癡盛故
著無而棄有者由衆生愚癡熾盛於世間無法不應
著而起著於如如有法不應捨而棄捨已說求真實

次說求真實譬喻偈曰

如彼起幻師 譬說虛分別 如彼諸幻事

譬說二種迷

釋曰如彼起幻師譬說虛分別者譬如幻師依呪術力變木石等以爲迷因如是虛分別依他性亦爾起種種分別爲顛倒因如彼諸幻事譬說二種迷者譬如幻像金等種種相貌顯現如是所起分別性亦爾能取所取二迷恒時顯現偈曰

如彼無體故 得入第一義 如彼可得故
通達世諦實

釋曰如彼無體故得入第一義者如彼謂幻者幻事無有實體此譬依他分別二相亦無實體由此道理即得通達第一義諦如彼可得故通達世諦實者可得謂幻者幻事體亦可得此譬虛妄分別亦爾由此道理即得通達世諦之實偈曰

彼事無體故 即得真實境 如是轉依故
即得真實義

釋曰彼事無體故即得真實境者若人了彼幻事無體即得木等實境如是轉依故即得真實義者若諸菩薩了彼二迷無體得轉依時即得真實性義偈

曰

迷因無體故 無迷自在行 倒因無體故

無倒自在轉

釋曰迷因無體故無迷自在行者世間木石等雖復無體而為迷因若得無迷行則自在不依於他倒因無體故無倒自在轉者如是依未轉時雖復無體而為倒因若得轉時由無倒故聖人亦得自在依自在行偈曰

是事彼處有 彼有體亦無 有體無有故

是故說是幻

釋曰是事彼處有彼有體亦無者此顯幻事有而非有何以故有者是幻像事彼處顯現故非有者彼實體不可得故有體無有故是故說是幻者如是有體與無體無二由此義故說彼是幻偈曰

無體非無體 非無體即體 無體體無二

是故說是幻

釋曰無體非無體非無體即體者此顯幻事非有而有何以故非有者彼幻事無體由無實體故而有者彼幻事非無體由像顯現故無體體無二是故說是幻者如是無體與體無二由此義故說彼是幻偈曰

說有二種光 而無二光體 是故說色等有體卽無體

釋曰說有二種光而無二光體者此顯虛妄分別有而非有何以故有者彼二光顯現故非有者彼實體不可得故是故說色等有體卽無體者由此義故故說色等有體卽是無體偈曰

無體非無體 非無體卽體 是故說色等

無體體無二

釋曰無體非無體非無體卽體者此顯虛妄分別非有而有何以故非有者彼二光無體由無實體故而

有者彼二光非無體由光顯現故是故說色等無體體無二者由此義故故說色等無體與體而無有二問體與無體何不一向定說而令彼二無差別耶偈曰

有邊爲遮立 無邊爲遮詢 退大趣小滅 遮彼亦如是

釋曰如其次第一爲遮有邊二爲遮無邊三爲遮趣小乘寂滅是故不得一向定說問云何遮有邊答有邊爲遮立此明由於無體知無體故不應安立有問云何遮無邊答無邊爲遮詢此明由於有體知世諦

故不應非謗無問云何遮趣小乘寂滅答退大趣小滅遮彼亦如是此明由彼二無別故不應厭體入小涅槃偈曰

色識為迷因 識識為迷體 色識因無故

識識體亦無

釋曰色識為迷因識識為迷體者彼所迷境名色識彼能迷體名非色識色識無體故識識體亦無者色識無故非色識亦無何以故由因無故彼果亦無偈曰
幻像及取幻 迷故說有二 如是無彼二

而有二可得

釋曰幻像及取幻迷故說有二者迷人於幻像及取幻由迷故說有能取所取二事如是無彼二而有二可得者彼二雖無而二可得由迷顯現故問此譬欲何所顯偈曰

骨像及取骨 觀故亦說二 無二而說二

可得亦如是

釋曰骨像及取骨觀故亦說二者觀行人於骨像及取骨由觀故說有能觀所觀二事無二而說二可得亦如是者彼二雖無而二亦可得由觀顯現故問如

是觀已何法爲所治何法爲能治偈曰

應知所治體 謂彼法迷相 如是體無體

有非有如幻

釋曰應知所治體謂彼法迷相者此中應知所治體卽是法迷相法迷相者謂如是如是體故如是體無體有非有如幻者如是體說有者由虛妄分別故說非有者由能取所取二體與非體無別故如有亦如幻無亦如幻說此相如幻偈曰

應知能治體 念處等諸法 如是體無相

如幻亦如是

釋曰應知能治體念處等諸法者此中應知能治體卽是諸法諸法者謂佛所說念處等法如是如是體故如是體無相如幻亦如是者彼體亦如幻何以故如諸凡夫所取如是如是有體故如諸佛所說如是如是無體故如是體無相而佛世尊示現入胎出生踰城出家成正覺如是無相而光顯現是故如幻問若諸法同如幻以何義故一爲能治一爲所治偈曰

譬如強幻王 令餘幻王退 如是清淨法

能令染法盡

釋曰譬如強幻王令餘幻王退者彼能清淨法亦如

幻王由能對治染法得增上故彼所治染法亦如幻
王由於境界得增上故如是清淨法能令染法盡者
如彼強力幻王能令餘幻王退菩薩亦爾知法如幻
能以淨法對治染法是故無慢問世尊處處說如幻
如夢如焰如像如影如響如水月如化如此八譬各
何所顯偈曰

如幻至如化 次第譬諸行 二六二二六

一一一有三

釋曰如幻至如化次第譬諸行者幻譬內六入無有
我等體但光顯現故夢譬外六入所受用塵體無有

故焰譬心及心數二法由起迷故像復譬內六入由
是宿業像故影復譬外六入由是內入影內入增上
起故響譬所說法法如響故水月譬依法定法定則如
水法則如月由彼澄靜法顯現故化譬菩薩故意受
生不染一切所作事故二六二二六一一有三者
初二六謂內六入外六入彼幻夢二譬所顯二謂心
及心數彼焰譬所顯復二六謂內六入外六入彼像
影二譬所顯一一一謂說法三昧受生彼響月化三
譬所顯已說真實義次求能知智偈曰

不真及似真 真及似不真 如是四種智

能知一切境

釋曰不真及似真真及似不真者不真謂不真分別智由不隨順出世智分別故似真謂非真非不真分別智從初極通達分由隨順出世智故真謂出世無分別智證真如故似不真謂非分別非不分別智卽出世後得世智故如是四種智能知一切境者由此四智具足知一切境界已說求智次說求染汙及清淨偈曰

自界及二光

癡共諸惑起

如是諸分別

二實應遠離

釋曰自界及二光癡共諸惑起者自界謂自阿黎耶識種子二光謂能取光所取光此等分別由共無明及諸餘惑故得生起如是諸分別二實應遠離者二實謂所取實及能取實如是二實染汙應求遠離偈曰

得彼三緣已

自界處應學

如是二光滅

譬如調箭皮

釋曰得彼三緣已自界處應學者三緣謂內外俱如前說自界謂諸分別應如是解處謂名處此名處應安心應學謂修止觀二道如是二光滅譬如調箭皮

者謂分別二種光息譬如柔皮熟鞭令輒亦如調箭
端曲令直轉依亦爾若止若觀一一須修得心慧二
脫則二光不起如是清淨應求至得

大乘莊嚴經論卷第四 終

音釋

羯磨 梵語也此云作法羯居竭切 迫迨 迫博陌切迨側格切迨窘逼也 鞭魚 孟

切與硬同

大乘莊嚴經論卷第五

無 著 菩 薩 造

唐三藏波羅頗迦羅蜜多羅譯

述求品第十二之二

釋曰已說求染淨次說求唯識偈曰

能取及所取 此二唯心光 貪光及信光

二光無二法

釋曰能取及所取此二唯心光者求唯識人應知能
取所取此之二種唯是心光貪光及信光二光無二
法者如是貪等煩惱光及信等善法光如是二光亦

無染淨二法何以故不離心光別有貪等信等染淨法故是故二光亦無二相偈曰

種種心光起 如是種種相 光體非體故 不得彼法實

釋曰種種心光起如是種種相者種種心光卽是種種事相或異時起或同時起異時起者謂貪光瞋光等同時起者謂信光進光等光體非體故不得彼法實者如是染位心數淨位心數唯有光相而無光體是故世尊不說彼爲真實之法已說求唯識次說求諸相偈曰

所相及能相 如是相差別 爲攝利衆生 諸佛開示現

釋曰相有二種一者所相二者能相此偈總舉餘偈別釋偈曰

共及心及見 及位及不轉 略說所相五 廣說則無量

釋曰共及心及見及位及不轉者所相有五一者色法二者心法三者心數法四者不相應法五者無爲法彼共者謂色法心者謂識法見者謂心數法位者謂不相應法不轉者謂虛空等無爲法略說所相五

廣說則無量者彼識常起如是五相此五所相是世
尊略說若廣說者則有無量差別已說所相諸相次
說能相諸相偈曰

意言與習光 名義互光起 非真分別故
是名分別相

釋曰能相略說有三種謂分別相依他相真實相此
偈顯示分別相此相復有三種一有覺分別相二無
覺分別相三相因分別相意言者謂義想義即想境
想即心數由此想於義能如是如是起意言解此是
有覺分別相習光者習謂意言種子光謂從彼種子

直起義光未能如是如是起意言解此是無覺分別
相名義互光起者謂依名起義光依義起名光境界
非真唯是分別世間所謂若名若義此是相因分別
相如此三種相悉是非真分別是名分別相偈曰
所取及能取 二相各三光 不真分別故
是說依他相

釋曰此偈顯示依他相此相中自有所取相及能取
相所取相有三光謂句光義光身光能取相有三光
謂意光受光分別光意謂一切時染汙識受謂五識
身分別謂意識彼所取相三光及能取相三光如此

諸光皆是不真分別故是依他相偈曰

無體體無二 非寂靜寂靜 以無分別故

是說真實相

釋曰此偈顯示真實相真實謂如也此相有三種一自相二染淨相三無分別相無體體無二者是真實自相無體者一切諸法但分別故體者以無體為體故無二者體無體無別故非寂靜寂靜者是真實染淨相非寂靜者由客塵煩惱故寂靜者由自性清淨故以無分別故者是真實無分別相由分別不行境界無戲論故已說三種能相復次偈曰

應知五學境 正法及正憶 心界有非有

第五說轉依

釋曰彼能相復有五種學境一能持二所持三鏡像四明悟五轉依能持者謂佛所說正法由此法持彼能緣故所持者即正憶念由正法所持故鏡像者謂心界由得定故安心法界如先所說皆見是名定心為鏡法界為像故明悟者出世間慧彼有如實見有非有如實見非有有謂法無我非有謂能取所取於此明見故轉依者偈曰

聖性證平等 解脫事亦一 勝則有五義

不減亦不增

釋曰聖性證平等解脫事亦一者聖性謂無漏界證平等者諸聖同得故解脫事亦一者諸佛聖性與聲聞緣覺平等由解脫同故勝則有五義不減亦不增者雖復聖性平等然諸佛最勝自有五義一者清淨勝由漏習俱盡故二者普遍勝由刹土通淨故三者身勝由法身故四者受用勝由轉法輪受用不斷故五者業勝由住兜率天等現諸化事利益衆生故不減者謂染分減時不增者謂淨分增時此是五種學地解相以彼解脫所相法及三種能相法故已說所

相能相次說求解脫偈曰

如是種子轉 句義身光轉 是名無漏界

三乘同所依

釋曰如是種子轉者阿黎耶識轉故句義身光轉者謂餘識轉故是名無漏界者由解脫故三乘同所依者聲聞緣覺與佛同依止故偈曰

意受分別轉 四種自在得 次第無分別

刹土智業故

釋曰意受分別轉四種自在得者若意若受若分別如此三光若轉即得四種自在問何者爲四答次第

無分別刹土智業故一得無分別自在二得刹土自在三得智自在四得業自在偈曰

應知後三地 說有四自在 不動地有二

餘地各餘一

釋曰應知後三地說有四自在者謂不動地善慧地法雲地成就彼四種自在不動地有二餘地各餘一者不動地有第一無分別自在第二刹土自在由無功用無分別故由刹土清淨故善慧地有第三智自在由得四辯善巧勝故法雲地有第四業自在由諸通業無障礙故偈曰

三有二無我 了入真唯識 亦無唯識光
得離名解脫

釋曰復有別解脫門三有二無我了入真唯識者由知二無我為方便故菩薩於三有中分別人法皆無有體是故無我如是知已亦非一向都無有體取一切諸法真實唯識故亦無唯識光得離名解脫者菩薩爾時安心唯識識光亦無即得解脫何以故由人法不可得離有所得故偈曰

能持所持聚 觀故唯有名 觀名不見名
無名得解脫

釋曰復有別解脫門能持所持聚者能持謂所聞法
所持謂正憶念聚謂福智滿由先聚力故而有所持
觀故唯有名者但有言說無有義故復次唯名者唯
識故復次唯名者非色四陰故觀名不見名無名得
解脫者復次觀所觀名復不見名由義無體故又不
見識故又不見非色四陰故如是名亦不可得離有
所得故名解脫偈曰

我見熏習心 流轉於諸趣 安心住於內
迴流說解脫

釋曰復有別解脫門我見熏習心流轉於諸趣者有

二種我見滋灰故言熏習由此熏習爲因是故流轉
生死安心住於內迴流說解脫者若知所緣不可得
置心於內攝令不散卽迴彼流說名解脫已說求解
脫次求無自體偈曰

自無及體無 及以體不住 如執無體故
法成無自體

釋曰自無及體無及以體不住者自無謂諸法自然
無由不自起故不自起者屬因緣故體無謂諸法已
滅者不復起故及以體不住者現在諸法刹那刹那
不住故此三種無自體遍一切有爲相是義應知如

執無體故法成無自體者如所執著實無自體由自體無體故如諸凡夫於自體執著常樂我淨如是異分別相亦復無體是故一切諸法成無自體偈曰

無自體故成 前為後依止 無生復無滅

本靜性涅槃

釋曰無自體故成前為後依止者由前無性故次第成立後無生等問此云何答無生復無滅本靜性涅槃若無性則無生若無生則無滅若無生滅則本來寂靜若本來寂靜則自性涅槃如是前前次第為後後依止此義得成已說求無自性次說求無生忍偈

曰

本來及真實 異相及自相 自然及無異

染汙差別八

釋曰有八種無起法名無生法忍一者本來無起由生死非有本起故二者真實無起由法無先後異先起法無故三者異相無起由非舊種處更得起故四者自相無起由分別性畢竟不起故五者自然無起由依他性自性不起故六者無異無起由真實性非有異體起故七者染汙無起由盡智時染汙諸見不復起故八者差別無起由諸佛法身非有差別起故

此八無起法說名無生法忍已說求無生忍次說求
一乘偈曰

法無我解脫 同故性別故 得二意變化
究竟說一乘

釋曰此中八意佛說一乘一者法同故謂聲聞等人
無別法界由所趣同故故說一乘二者無我同故謂
聲聞等人同無我體由趣者同故故說一乘三者解
脫同故謂聲聞等人同滅惑障由出離同故故說一
乘四者性別故謂不定三乘性人引入大乘故說一
乘五者諸佛得同自意故謂諸佛得如此意如我所

得一切衆生亦同我得由此意故故說一乘六者聲
聞得作佛意故謂諸聲聞昔行大菩提聚時有定作
佛性彼時佛加故勝攝故得自知作佛意由此人前
後相續無別故說一乘七者變化故謂佛示現聲聞
而般涅槃爲教化故如佛自說我無量無數以聲聞
乘示現涅槃由離此方便更無方便化小根人入大
乘故理實唯一故說一乘八者究竟故謂至佛體無
復去處故說一乘如是處處經中以此八意佛說一
乘而亦不無三乘問若爾復有何義以彼彼意而說
一乘偈曰

引接諸聲聞 攝住諸菩薩 於此二不定

諸佛說一乘

釋曰彼彼意有二義一爲引接諸聲聞故二爲攝住諸菩薩故若諸聲聞於自乘性不定佛爲引接彼人令入大乘故說一乘若諸菩薩於自乘性不定佛爲攝住彼人令不退大乘故說一乘偈曰

聲聞二不定 見義不見義 見義不斷愛

斷愛俱輒根

釋曰聲聞不定復有二種一者見義乘彼見諦發大乘故二者不見義乘彼不見諦發大乘故見義復有

二種一者斷愛彼已離欲欲界故二者不斷愛彼未離欲欲界故此中見義二人應知俱是輒品由根鈍故偈曰

二得聖道人 迴向於諸有 迴向不思議

二生相應故

釋曰如是見義得聖道二人能以聖道迴向諸有如是迴向名不思議生由以聖道迴向生故如此二人與二生相應問何者二生偈曰

願力及化力 隨欲而受生 願力不斷愛

化住阿那含

釋曰二生者一願自在生二化自在生初是未離欲人後是阿那含人問如此二人云何輒品偈曰

由二樂涅槃 數數自厭故 二俱說鈍道 久久得菩提

釋曰由此二人先有樂滅心故恒起自厭心故是故彼道說爲鈍道由不能速得無上菩提故偈曰

所作未辦人 生在無佛世 修禪爲化故 漸得大菩提

釋曰所作未辦人者謂見諦未斷愛未得阿羅漢果人此人生在無佛世界生已自能勤修諸禪爲變化

故此人依止此化漸漸更得無上菩提如此三位如佛勝鬘經說如是聲聞次得緣覺後得作佛如大譬中說一者先見諦位二者佛空時生自能修禪捨於生身而受化身三者當得無上菩提已說求一乘次說求明處偈曰

菩薩習五明 總爲求種智 解伏信治攝 爲五五別求

釋曰菩薩習五明總爲求種智者明處有五一內明二因明三聲明四醫明五巧明菩薩學此五明總意爲求一切種智若不勤習五明不得一切種智故問

別意云何答解伏信治攝爲五五別求如其次第學
內明爲求自解學因明爲伏外執學聲明爲令他信
學醫明爲所治方學巧明爲攝一切衆生已說求明
處次說求長養善根所謂作意滿足諸波羅蜜此作
意有四十四種初謂知因作意乃至最後謂知我勝
作意此等作意今當顯說偈曰

知因及念依 共果與信解 四意隨次第
修習諸善根

釋曰此偈有四種作意一知因作意二念依作意三
共果作意四信解作意菩薩最初住性而作是念我

今自見波羅蜜性知可增長是名知因作意次作是
念我今已發大心諸波羅蜜決定當得圓滿何以故
以此大心爲依止故是名念依作意次作是念我已
發心爲利自他勤修諸波羅蜜此果若共卽願受之
若不共他卽願不受是名共果作意次作是念我今
勤行自他利時應通達涅槃真實方便所謂不染三
輪如過去諸佛曾解未來諸佛當解現在諸佛今解
我皆正住是名信解作意如是後後作意應知次第
亦爾偈曰

得喜有四種 二惡不能退 應知隨修意

此復有四種

釋曰此偈有三種作意一得喜作意二不退作意三隨修作意菩薩次作是念我今信解諸波羅蜜得四種喜謂障斷喜聚滿喜攝自他二利喜與依報二果喜是名得喜作意次作是念我今為成就自他佛法修行諸波羅蜜時雖遇惡人違逆惡事逼惱終無退心是名不退作意次作是念我今為得無上菩提於諸波羅蜜應起四種隨修所謂應懺悔六波羅蜜諸障應隨喜六波羅蜜諸行應勸請六波羅蜜法義應以六波羅蜜迴向無上菩提是名隨修作意偈曰

淨信及領受 樂說與被甲 起願亦希望
方便復七種

釋曰此偈有七種作意一淨信作意二領受作意三樂說作意四被甲作意五起願作意六希望作意七方便作意菩薩次作是念我今應於諸波羅蜜法義起深信力持是名淨信作意次作是念我今於諸波羅蜜法義應一向起求不生誹謗是名領受作意次作是念我今應以諸波羅蜜法義開示他人是名樂說作意次作是念我今應令諸波羅蜜滿足起大勇猛是名被甲作意次作是念我今為滿足諸波羅蜜

願值滿足諸緣是名起願作意次作是念我今求正成就緣是名希望作意次作是念我今思惟諸波羅蜜業伴方便是名方便作意此中被甲作意起願作意希望作意教授中當分別偈曰

勇猛及憐愍 如是二作意 應知二差別

一一有四種

釋曰此偈有二種作意一勇猛作意二憐愍作意此二各有四種差別菩薩思惟方便已次作是念我今應起四種勇猛為堅牢故為成熟故為供養故為親近故為堅牢者六六波羅蜜修所謂六施乃至六智

六施謂施施乃至施智戒等六種亦復如是為成熟者以諸波羅蜜為攝物方便成熟眾生成為供養者以檀為利益供養以戒等為修行供養為親近者親近不倒教授諸波羅蜜人是名勇猛作意次作是念我今應起四無量心諸波羅蜜現前時應起慈心慳等現前時應起悲心他人諸波羅蜜現前時應起喜心他人信諸波羅蜜時應起無染心是名憐愍作意偈曰

有羞亦有樂 及以無屈心 修治與稱說

此復為五種

釋曰此偈有五種作意一有羞作意二有樂作意三無屈作意四修治作意五稱說作意菩薩次作是念若我於諸波羅蜜懈怠不作及以邪作應起深慚愧等應轉檀等不轉是名有羞作意次作是念我今於所緣諸波羅蜜境界應持心不亂是名有樂作意次作是念我今於退諸波羅蜜方便作怨家想是名無屈作意次作是念我今於諸波羅蜜相應諸論應善集修治是名修治作意次作是念我今爲生他解應如其根器應讚揚諸波羅蜜法義是名稱說作意偈

曰

依度得菩提

非隨自在等

過惡及功德

此二亦應知

釋曰此偈有二作意一依度作意二應知作意菩薩如前稱揚已次作是念我今依止諸波羅蜜得大菩提非依自在天等是名依度作意次作是念我今應知障諸波羅蜜過惡及諸波羅蜜功德是名應知作意偈曰

喜集及見義

樂求求四種

平等無分別

現持當緣故

釋曰此偈有三種作意一喜集作意二見義作意三

樂求作意菩薩知已次作是念我應歡喜聚集福智
 二聚是名喜集作意次作是念我今見諸波羅蜜自
 性能得無上菩提利益是名見義作意次作是念今
 見是利應以四求一求平等止觀雙修故二求無分
 別三輪清淨故三求現持求持能成諸度法義故四
 求當緣求未來成就諸度緣故是名樂求作意偈曰
 七非有取見 四種希有想 翻此非希有
 此想亦有四

釋曰此偈有三種作意一見非有取作意二希有想
 作意三非希有想作意菩薩樂求已次作是念七種

非有取我今應見一非有為有非有取二過失非失
 非有取三功德非德非有取四非常為常非有取五
 非樂為樂非有取六非我為我非有取七寂滅非滅
 非有取如來為對治此七非有取次第說空等三三
 昧及說四種法優陀那是名見非有取作意次作是
 念我今於諸波羅蜜應起四種希有想所謂大想廣
 想不求報恩想不期果報想是名希有想作意次作
 是念翻此希有於諸波羅蜜亦有四種非希有想所
 謂由諸波羅蜜廣大故能得無上菩提能住自他平
 等能不求一切世間供養能不求過諸世間勝身勝

財是名非希有想作意偈曰

離墮衆生邊 大義及轉施 究竟與無間

如是復五種

釋曰此偈有五種作意一離邊作意二大義作意三轉施作意四究竟作意五無間作意菩薩次作是念我今應以諸波羅蜜於一切衆生轉是名離邊作意次作是念我今應以諸波羅蜜廣饒益一切衆生是名大義作意次作是念我今所有諸波羅蜜功德願施一切衆生是名轉施作意次作是念願一切衆生所有諸波羅蜜三處究竟謂菩薩地究竟如來地究

竟利益衆生究竟是名究竟作意次作是念我應修習諸波羅蜜於一切時無有間斷是名無間作意偈曰

方便恒隨攝 心住不顛倒 於退則不喜

進則歡喜生

釋曰此偈有三種作意一隨攝作意二不喜作意三歡喜作意菩薩次作是念我今應住不顛倒心於佛所知應以諸波羅蜜恒時隨攝是名隨攝作意次作是念我今於退屈諸波羅蜜者不應生悅是名不喜作意次作是念我今於增進諸波羅蜜者應生慶悅

是名歡喜作意偈曰

相似不欲修 真實欲修習 不隨及欲得

欲得有二種

釋曰此偈有四種作意一不欲修作意二欲修作意三不隨作意四欲得作意菩薩次作是念我今於相似諸波羅蜜不應修習是名不欲修作意次作是念我今於真實諸波羅蜜應勤修習是名欲修作意次作是念我今於諸波羅蜜障礙作意應斷是名不隨作意次作是念我今欲得授記位諸波羅蜜欲得決定地諸波羅蜜是名欲得作意偈曰

定作未來行 常觀他行滿 信解自第一

知體無上故

釋曰此偈有三種作意一定作作意二觀他作意三我勝作意菩薩次作是念我見當來諸趣以智方便一切波羅蜜決定當行是名定作作意次作是念我今應觀十方諸大菩薩諸波羅蜜得滿足時願我亦得滿足同一事故是名觀他作意次作是念我今自信所行諸波羅蜜於諸行中最爲第一何以故我觀此體更無上故是名我勝作意偈曰

以此諸作意 修習於諸度 菩薩一切時

善根得圓滿

釋曰此偈總結前義應知己說求長養善根次說求法差別偈曰

求法謂增長 上意及廣大 有障亦無障

及以諸神通 無身亦有身 得身及滿身

多慢及少慢 及以無慢故

釋曰求法有十三種差別一者增長求謂以正聞增長信故二者上意求謂在佛邊受法流故三者廣大求謂得神通菩薩具足遠聞諸佛法故四者有障求謂初增長信者故五者無障求謂上意求者故六者

神通求謂廣大求者故七者無身求謂聞思慧無法身故八者有身求謂修慧有多聞熏習種子身故九者得身求謂初地至七地十者滿身求謂八九十地十一者多慢求謂信行地十二者少慢求謂初七地十三者無慢求謂後三地已說求法差別次說求法因緣偈曰

爲色爲非色 爲通爲正法 相好及病愈

自在無盡因

釋曰求法有四因緣一爲色二爲非色三爲神通四爲正法爲色者相好因故爲非色者滅煩惱病因故

爲神通者自在因故爲正法者無盡因故如梵天王
問經說菩薩求法具足四想一者如妙寶想難得義
故二者如良藥想除病義故三者如財物想不散義
故四者如涅槃想苦滅義故由法是相好莊嚴因故
如妙寶想由法是滅煩惱病因故如良藥想由法是
神通自在因故如財物想由法是正法無盡因故如
涅槃想已說求法因緣次說求遠離分別偈曰

無體體增減 一異自別相 如名如義著
分別有十種

釋曰有十種分別一者無體分別二者有體分別三

者增益分別四者損減分別五者一相分別六者異
相分別七者自相分別八者別相分別九者如名起
義分別十者如義起名分別般若波羅蜜經中爲令
諸菩薩遠離此十種分別故說十種對治爲對治無
體分別故經言有菩薩菩薩爲對治有體分別故經
言不見菩薩等爲對治增益分別故經言舍利弗色
自性空爲對治損減分別故經言非色滅空爲對治
一相分別故經言若色空非色爲對治異相分別故
經言空不異色色不異空空卽是色爲對治自相分
別故經言此色唯名爲對治別相分別故經言色不

生不滅非染非淨等爲對治如名起義分別故經言
名者作故客故如名義不應著爲對治如義起名分
別故經言一切名不可見不可見故如義名不應著
已說求遠離分別次說求法大偈曰

菩薩勝勇猛 二求得真實 隨順諸世間

功德如海滿

釋曰求法有三種大一者方便大由最上精進求世
諦第一義諦真實不顛倒故二者他利大由作世間
依怙以第一義安置故三者自利大由一切功德如
海滿足故述求品究竟

分別故經言

名者作故客。如名義不應著為對治。如表起名分別。故經言一切名不可見不可見。故如義名不應著已說求遠離分別。次說求法大偈曰

菩薩勝勇猛 二求得真實 隨順諸世間

功德如海滿

釋曰求法有三種大。一者方便大由最上精進求世諦。第一義諦真實不顛倒。故二者他利大由作世間依怙。以第一義安置。故三者自利大由一切功德如海滿足。故述求品究竟

名者作故客故如名義不應著為對治如義起名分
別故經言一切名不可見不可見故如義名不應著
已說求遠離分別次說求法大傷曰

菩薩勝勇猛 二求得真實 隨順諸世間
功德如海滿

釋曰求法有三種大一者方便大由最上精進求世
諦第一義諦真實不顛倒故二者他利大由作世間
依怙以第一義安置故三者自利大由一切功德如
海滿足故述求品究竟